

四庫全書

史部

欽定四庫全書

宋史卷二十四

元中書右丞相總裁托克托等修

本紀第二十四

高宗一

高宗受命中興全功至德聖神武文昭仁憲孝皇帝諱
構字德基徽宗第九子母曰顯仁皇后韋氏大觀元年
五月乙巳生東京之大內赤光照室八月丁丑賜名授

定武軍節度使檢校太尉封蜀國公二年正月庚申封
廣平郡王宣和三年十二月壬子進封康王資性朗悟
博學彊記讀書日誦千餘言挽弓至一石五斗宣和四
年始冠出就外第靖康元年春正月金人犯京師軍于
城西北遣使入城邀親王宰臣議和軍中朝廷方遣同
知樞密院事李昉等使金議割太原中山河間三鎮遣
宰臣授地親王送大軍過河欽宗召帝諭指帝慷慨請
行遂命少宰張邦昌為計議使與帝俱金帥斡離不留

之軍中旬日帝意氣閒暇二月會京畿宣撫司都統制姚平仲夜襲金人若不克金人見責邦昌恐懼涕泣帝不為動韓離不異之更請肅王癸卯肅王至軍中許割三鎮地進邦昌為太宰留質軍中帝始得還金兵退復遣給事中王雲使金以租賦贖三鎮地又以蠟書結遼降將耶律余覲為金人所得八月金帥粘罕復引兵深入陷太原韓離不破真定冬十月王雲從吏自金先還言金人須帝再至乃議和雲歸言金人堅欲得地不然

進兵取汴都十一月詔帝使河北奉袞冕玉輅尊金主
為伯上尊號十八字被命即發京師以門下侍郎耿南
仲主和議請與俱乃以其子中書舍人延禧為參議官
偕行帝由滑濬至磁州守臣宗澤請曰肅王去不返金
兵已迫復去何益請留磁磁人以雲將挾帝入金遂殺
雲時粘罕斡離不已率兵渡河相繼圍京師從者以磁
不可留知相州汪伯彥亦以蠟書請帝還相州閏月耿
南仲馳至相見帝致辭以面受欽宗之旨盡起河北兵

入衛帝乃同南仲募兵勤王初朝廷聞金兵渡河欲拜
帝為元帥至是殿中侍御史胡唐老復申元帥之議尚
書右僕射何梟擬詔書以進欽宗遣閤門祇候秦仔持
蠟詔至相拜帝為河北兵馬大元帥知中山府陳亨伯
為元帥汪伯彥宗澤為副元帥仔於頂髮中出詔帝讀
之嗚咽兵民感動十二月壬戌朔帝開大元帥府有兵
萬人分為五軍命武顯大夫陳淬都統制軍馬閤門祇
候侯章齎蠟書至自京師詔帝盡發河北兵命守臣自

將帝乃下令諸郡守與諸將議引兵渡河乙亥帝率兵離相州丙子履水渡河丁丑次大名府宗澤以二千人先諸軍至知信德府梁揚祖以三千人繼至張俊苗傅楊沂中田師中皆在麾下兵威稍振會簽書樞密院事曹輔齋蠟詔至云金人登城不下方議和好可屯兵近甸毋輕動汪伯彥等皆信和議惟宗澤請直趨澶淵為壁次第解京城之圍伯彥南仲請移軍東平帝遂遣澤以萬人進屯澶淵揚言帝在軍中自是澤不復預府中

謀議帝決意趨東平庚寅帝發大名

建炎元年春正月癸巳帝至東平初帝軍在相州京城圍久中外莫知帝處及是陳請四集取決帥府壬寅高陽關路安撫使黃潛善總管楊惟忠亦部兵數千至東平命潛善進屯興仁留惟忠為元帥都統制金人聞帝在澶淵遣甲士及中書舍人張澂來召宗澤命壯士射之澂乃遁伯彥等請帝如濟州二月庚辰發東平癸未次濟州時帥府官軍及羣盜來歸者號百萬人分屯濟

濮諸州府而諸路勤王兵不得進二帝已在金人軍中三月丁酉金人立張邦昌為帝稱大楚黃潛善以告帝慟哭僚屬欲奉帝駐軍宿州謀渡江左帝聞三軍籍籍遂輒承制以宗澤為徽猷閣待制丁巳幹離不退師徽宗北遷戊午承制以汪彥伯為顯謨閣待制充元帥潛善為徽猷閣待制充副元帥夏四月粘罕退師欽宗北遷癸亥邦昌尊元祐皇后為宋太后遣人至濟州訪帝又遣吏部尚書謝克家來迎耿南仲率幕僚勸進帝避

席流涕遜辭不受伯彥等引天命人心為請且謂靖康紀元為十二月立康之兆帝曰當更思之以知淮寧府趙子崧為寶文閣學士元帥府參議官東南道總管統東南勤王兵邦昌遣閤門宣贊舍人蔣師愈等持書詣帝自言從權濟事及將歸寶避位之意帝亦貽諸帥書以未得至京已至者毋輒入聞資政殿大學士領開封府事李綱在湖北遣劉黶持書訪之又諭宗澤等以受偽命之人義當誅討然慮事出權宜未可輕動澤復書

謂邦昌篡亂踪跡已無可疑宜早正天位興復社稷不
可不斷門下侍郎呂好問亦以蠟書來言帝不自立恐
有不當立而立者丁卯謝克家以大宋受命之寶至濟
州帝慟哭跪受命克家還京師趣辦儀物戊辰濟州父
老詣軍門言州四旁望見城中火光屬天請帝即位于
濟會宗澤來言南京乃藝祖興王之地取四方中漕運
尤易遂決意趨應天是夕邦昌手書上延福宮太后尊
號曰元祐皇后入居禁中以尚書左丞馮澥為奉迎使

皇后又遣兄子衛尉少卿孟忠厚持手書遺帝皇后垂簾聽政邦昌權尚書左僕射率在京百官上表勸進不許甲戌皇后手書告中外俾帝嗣統乙亥百官再上表又不許丁丑馮澥等至濟州百官三上表許以權聽國事戊寅命宗澤先勒兵分駐長垣韋城等縣以備非常東道副總管朱勝非至濟州宣撫司統制官韓世忠以兵來會庚辰帝發濟州廊延副總管劉光世自陝州來會以光世為五軍都提舉辛巳次單州壬午次虞城縣

西道都統管王襄自襄陽來會癸未至應天府皇后詔
有司備法駕儀仗乙酉張邦昌至伏地慟哭請死帝慰
撫之承制以汪伯彥為顯謨閣直學士黃潛善為徽猷
閣直學士權吏部尚書王時雍等奉乘輿服御至羣臣
勸進者益衆命有司築壇府門之左五月庚寅朔帝登
壇受命禮畢慟哭遙謝二帝即位于府治改元建炎大
赦常赦所不原者咸赦除之張邦昌及應于供奉金國
之人一切不問命西京留守司修奉祖宗陵寢罷天下

神霄宮住散青苗錢應死節及歿于王事者並推恩奉使未還者祿其家一年應選人並循資已係承直郎者改次等京官臣僚因亂去官者限一月還任潰兵羣盜咸許自新免係官欠負蠲南京及元帥府常駐軍一月以上州縣夏稅應天府特奏名舉人並與同進士出身免解人與免省諸路特奏名三舉以上及宗室嘗預貢者並推恩應募兵勤王人以兵付州縣主兵官聽赴行在中外臣庶許言民間疾苦雖詆訐亦不加罪命官犯

罪更不取特旨裁斷蔡京童貫朱勔李彥孟昌齡梁師成譚稹及其子孫更不收叙内外大臣限十日各舉布衣有材畧者一人餘如故事以黃潛善為中書侍郎汪伯彥同知樞密院事元祐皇后在東京是日徹簾辛卯遙尊乾龍皇帝為孝慈淵聖皇帝元祐皇后為元祐太后詔史官辨宣仁聖烈皇后誣謗築景靈宮于江寧府壬辰以張邦昌為太保奉國軍節度使同安郡王五日一赴都堂參決大事以河東北宣撫使范訥為京城留

守癸巳遙尊帝母韋賢妃為宣和皇后遙立嘉國夫人
邢氏為皇后耿南仲罷甲午以李綱為尚書右僕射兼
中書侍郎趣赴行在楊惟忠為建武軍節度使主管殿
前司公事罷諸盜及民兵之為統制者簡其士馬隸五
軍乙未以生辰為天申節馮澥罷以兵部尚書呂好問
為尚書右丞命中軍統制馬忠後軍統制張渙率兵萬
人趣河間府追襲金人丙申以呂好問兼門下侍郎丁
酉以黃潛善兼御營使汪伯彥副之真定府路副總管

王淵為都統制廊延路副總管劉光世提舉一行事務
王時雍黃州安置命統制官薛廣張瓊率兵六千人會
河北山西砦義兵共復磁相戊午以資政殿學士路允
迪為京城撫諭使龍圖閣學士耿延禧副之贈吏部侍
郎李若水觀文殿學士謚忠愍己亥召太學生陳東赴
行在李綱至江寧誅叛卒周德等庚子詔以靖康大臣
主和誤國責李邦彥為建寧軍節度副使潯州安置徙
吳敏柳州蔡懋英州李棨宇文虛中鄭望之李鄴皆以

使金請割地責廣南諸州並安置辛丑詔張邦昌知幾
達變勲在社稷如文彥博例月兩赴都堂壬寅封後宮
潘氏為賢妃以江淮發運使梁揚祖提領東南茶鹽事
癸卯天申節罷百官上壽乙巳賜諸路勤王兵還營者
錢人三千丙午以誣謗宣仁聖烈皇后追貶蔡確蔡卞
邢恕蔡懋官以保靜軍節度使姚古知河南府金人陷
河中府權府事郝仲連死之丁未徽宗至燕山府庚戌
以宗澤為龍圖閣學士知襄陽府壬子進張邦昌太傅

丙辰罷監察御史張所尋責江州安置丁巳詔成都京兆襄陽荆南江寧府鄧揚二州儲資糧修城壘以備巡幸以簽書樞密院事張叔夜嘗援京城力戰從徽宗北行遙命為觀文殿大學士醴泉觀使戊午右諫議大夫范宗尹罷遣太常少卿周望使河北軍前通問二帝西道總管王襄北道總管趙野坐勤王稽緩並分司襄陽府青州居住尋責襄永州野邵州並安置六月己未朔李綱入見上十議曰國是巡幸赦令僭逆偽命戰守本

政責成修德以前殿前副都指揮使王宗濂引衛兵遁
逃致都城失守責官邵州安置徽猷閣直學士徐秉哲
假資政殿學士為大金通問使秉哲辭庚申封靖康軍
節度使仲湜嗣濮王黏罕還屯雲中辛酉命新任郎官
未經上殿者並引對御史中丞顏岐罷徐秉哲責官梅
州安置詔河北京陝淮湖江浙州軍縣鎮募人修築城
壁壬戌置登聞檢鼓院癸亥以黃潛善為門下侍郎兼
權中書侍郎張邦昌坐僭逆責降招化軍節度副使潭

州安置及受僞命臣僚王時雍高州吳玠永州莫儔全州李擢柳州孫覲歸州並安置顏博文王紹以下論罪有差以知懷州霍安國河東宣撫使劉韜死節贈安國延康殿學士韜資政殿大學士甲子命李綱兼御營使乙丑以龍神衛四廂都指揮使馬忠為河北經制使措置民兵洪芻罷左諫議大夫下臺獄丁卯以祠部員外郎喻汝礪為四川撫諭督漕計羨緡及常平錢物罷開封諸州軍府司錄曹掾官州軍通判二員者省其一權

減宰執奉賜三之一省諸路提舉常平司兩浙福建提
舉市舶司賊李孝忠寇襄陽守臣黃叔敖棄城遁立格
買馬辛未以子塲生大赦籍天下神霄宮錢穀充經費
拘天下職田錢隸提刑司還元祐黨籍及上書人恩數
癸酉詔陝西山東諸路帥臣團結軍民互相應援乙亥
增諸縣弓手置武尉領之宗室叔向以所募勤王兵屯
京師或言為變命劉光世捕誅之戊寅以汪伯彥知樞
密院事遣宣義郎傅雱使河東軍前通問二帝己卯置

沿河沿淮沿江帥府十有九要郡三十九次要郡三十
八帥守兼都總管守臣兼鈐轄都監總制軍九十六萬
七千五百人別置水軍七十七將造舟江淮諸路置三
省樞密院賞功司東京留守范訥落節鉞淄州居住庚
辰以二帝未還禁州縣用樂辛巳置沿河巡察六使壬
午以戶部尚書張慤同知樞密院事兼提舉措置戶部
財用癸未呂好問罷甲申併尚書戶部右曹所掌歸左
曹命尚書總領乙酉以宗澤為東京留守杜充為北京

留守罷監司州郡職田丙戌詔陝西河北京東西路募
兵合十萬人更番入衛行在命京東西路造戰車丁亥
以張所為河北西路招撫使括買官民馬勸出財助國
戊子以錢蓋為陝西經制使封趙懷恩為安化郡王因
召五路兵赴行在秋七月己丑朔以樞密副都承旨王
玘為河東經制使庚寅詔王淵劉光世統制官張俊喬
仲福韓世忠分討陳州軍賊杜用京東賊李昱及黎驛
魚臺潰兵皆平之辛卯籍東南諸州神霄宮及瞻學錢

助國用叙右監門衛大將軍貴州團練使士瑀以磁洛義兵復洺州乙未以溫州觀察使范瓊為定武軍承宣使御營司同都統制丙申賜諸路彊壯巡社名為忠義巡社專隸安撫司戊戌欽宗至燕山府以忻州觀察使張渙為河北制置使東都宣武卒杜林謀據成都叛伏誅己亥詔臺省寺監繁簡相兼學官館職減舊制之半辛丑復議吳玠莫儔等十一人罪並廣南江湖諸州安置餘遞貶有差壬寅詔奉元祐太后如東南六宮及衛

士家屬從行朕當獨留中原與金人決戰以延康殿學士許翰為尚書右丞甲辰以右諫議大夫宋齊愈當金人謀立異姓書張邦昌姓名斬于都市乙巳手詔京師未可往當巡幸東南丙午詔定議巡幸南陽以觀文殿學士范致虛知鄧州修城池繕宮室輸錢穀以實之丁未遣官詣京師迎奉太廟神主赴行在己酉罷四道都總管以尚書虞部員外郎張浚為殿中侍御史庚戌徵諸道兵期八日會行在丙辰徽宗自燕山密遣閣門宣

贊舍人曹勛至賜帝絹半臂書其領曰便可即真來援
父母帝泣以示輔臣張所傳亮軍發行在是月關中賊
史斌犯興州僭號稱帝八月戊午朔洪芻等坐圍城日
括金銀自盜及私納宮人芻及余大均陳冲貸死流沙
門島餘五人罪有差勝捷軍校陳通作亂于杭州執帥
臣葉夢得殺漕臣吳昉己未元祐太后發京師庚申以
劉光世為奉國軍節度使韓世忠張俊皆進一官辛酉
右司諫潘良貴罷壬戌以李綱為尚書左僕射兼門下

侍郎黃潛善為右僕射兼中書侍郎張懋兼御營副使
癸亥命御營使副大閱五軍庚午更號元祐太后為隆
祐太后辛未罷傅亮經制副使召赴行在壬申召布衣
譙定赴行在命御營統制辛道宗討陳通是夕東北方
有赤氣癸酉以耿南仲主和誤國南雄州安置乙亥用
張浚言罷李綱左僕射丙子隆祐太后發南京命侍衛
馬軍都指揮使郭仲荀護衛如江寧兼節制江淮荆浙
閩廣諸州制置東南盜賊丁丑以龍圖閣直學士錢伯

言知杭州節制兩浙淮東將兵及福建槍杖手討陳通
庚辰降榜招諭杭州亂兵壬午用黃潛善議殺上書太
學生陳東崇仁布衣歐陽澈乙酉遣兵部員外郎江端
友等撫諭閩浙湖廣江淮京東西諸路及體訪官吏貪
庶軍民利病許翰罷丁亥博州卒宮儀作亂犯萊州九
月己丑建州軍校張員等作亂執守臣張動轉運副使
毛奎為所殺判官曹仔嬰城自守范瓊捕斬李孝忠于
復州壬辰以金人犯河陽汜水軍詔擇日巡幸淮甸鑄

建炎通寶錢命淮浙沿海諸州增修城壁招訓民兵以備海道甲午命揚州守臣呂頤浩繕修城池宗澤往河北視師七月還是夜辛道宗兵潰于嘉興縣丁酉詔荆襄關陝江淮皆備巡幸戊戌罷買馬己亥以子粦為檢校少保集慶軍節度使封魏國公詔内外官司參用嘉祐元豐勅以俟新書庚子二帝徙居霅郡辛丑陳通劫提點刑獄周格營殺格執提點刑獄高士瞻壬寅遣徽猷閣待制孟忠厚迎奉太廟神主赴揚州以直秘閣王猷閣待制孟忠厚迎奉太廟神主赴揚州以直秘閣王

圭為招撫判官代張所尋責所廣南安置乙巳宗澤表
請車駕還闕戊申河北招撫司都統制王彥渡河擊金
人破之復新興縣己酉以諜報金人欲犯江浙詔暫駐
淮甸捍禦稍定即還京闕募民入貲授官軍賊趙萬入
常州執守臣何袞罷諸路經制招撫使庚戌始通當三
大錢于淮浙荆湖諸路壬子命湖南撫諭官馬伸持詔
賜張邦昌死于潭州併誅王時雍癸丑詔有敢妄議惑
衆沮巡幸者許告而罪之不告者斬乙卯王彥及金人

戰敗績奔太行山聚衆其裨將岳飛引其部曲自為一軍趙萬陷鎮江府守臣趙子崧棄城渡江保瓜洲是秋金人分兵據兩河州縣惟中山慶源府保莫邢洺冀磁絳相州久之乃陷冬十月丁巳朔帝登舟幸淮甸戊午太后至揚州己未罷諸路勸誘獻納錢物庚申罷諸路召募潰兵忠義等人及寄居官擅集勤王兵者癸亥募羣盜能併滅賊衆者官之甲子以張浚論李綱不已落綱觀文殿大學士止奉宮祠知秀州兼權浙西提點刑

獄趙叔近入杭州招撫陳通乙丑罷帥府要郡次要郡
及新軍水軍丁卯以王淵為杭州制置盜賊使統制官
張俊從行庚午次泗州幸普照寺甲戌太白晝見己卯
次楚州寶應縣後軍將孫琦等作亂逼左正言盧臣中
墮水死庚辰命劉光世討鎮江叛兵辛巳以光世為滁
和濠州江寧府界招捉盜賊制置使御營統制官苗傅
為使司都統制朝請郎李棫提舉廣西左右兩江峒丁
公事癸未至揚州禁內侍統兵官相見丙戌王淵張俊

誘趙萬等悉誅之十一月戊子李綱鄂州居住真定軍賊張遇入池州守臣滕祐棄城遁己丑詔雜犯死罪有疑及情理可憫者無諭官同提刑司酌情減降先斷後聞壬辰遣王倫等為金國通問使乙未以張慤為尚書左丞工部尚書顏岐同知樞密院事丙申曲赦應天府亳州揚泗楚州高郵軍丙午以張慤為中書侍郎戊申以顏岐為尚書左丞兼權門下侍郎御史中丞許景衡為右丞刑部尚書郭三益同知樞密院事權密州趙野

棄城遁軍校杜彥據州追野殺之辛亥命福建路增招
弓手金人陷河間府是月軍賊丁進圍壽春府守臣康
允之拒却之十二月丙辰朔命從臣四員充講讀官就
內殿講讀丁巳詔諸路提刑司選官即轉運司所在州
類省試進士以待親策辛酉王淵入杭州執陳通等誅
之壬戌青州敗將王定以兵作亂殺帥臣曾孝序癸亥
粘罕犯汜水關西京留守孫昭遠遣將拒之戰歿昭遠
引兵南遁尋命部將王仔奉啓運宮神御赴行在甲子

改授后父徽猷閣待制邢煥為光州觀察使乙丑詔凡
刑賞大政並經三省其干請墨勅行下者罪之丙寅張
遇犯江州戊辰金人圍棣州守臣姜綱之固守金兵解
去甲戌金人陷同州守臣鄭驥死之張遇犯黃州己卯
金人陷汝州入西京庚辰金人陷華州辛巳破潼關河
東經制使王瓊自同州引兵遁入蜀丁進詣宗澤降乙
酉增置廣西弓手以備邊以戶部尚書黃潛厚為延康
殿學士同提舉措置財用

宋史卷二十四

欽定四庫全書

宋史卷二十五

元中書右丞相總裁托克托等修

本紀第二十五

高宗二

二年春正月丙戌朔帝在揚州丁亥錄兩河流亡吏士
沿河給流民官田牛種戊子金人陷鄧州委撫劉汲死
之辛卯置行在權貨務壬辰金人犯東京宗澤遣將擊

卻之癸巳復明法新科甲午詣壽寧寺謁祖宗神主乙未金人破永興軍前河東經制副使傅亮以兵降經略使唐重副總管楊宗閔提舉軍馬陳迪轉運副使桑景詢判官曾謂提點刑獄郭忠孝經略司主管機宜文字王尚及其子建中俱死之東平府兵馬鈐轄孔彥舟叛渡淮犯黃州守臣趙令歲拒之內申詔自今犯枉法自盜賊者中書籍其姓名罪至徒者永不錄用金人陷均州守臣楊彥明遁去丁酉金人陷房州己亥張遇焚真

州祕閣修撰孫昭遠為亂兵所害庚子遣主客員外郎
謝亮為陝西撫諭使兼宣諭使持詔賜夏國張遇陷鎮
江府守臣錢伯言棄城走辛丑內侍邵成章坐輒言人
臣除名南雄州編管金人陷鄭州通判趙伯振死之癸
卯金帥窩里溫陷濰州又陷青州尋棄去丁未詔諭流
民潰兵之為盜賊者釋其罪己酉禁諸將引潰兵入蜀
置大散關使以審驗之庚戌遣考功員外郎傅雱為淮
東京東西撫諭使辛亥王淵招降張遇以所部萬人隸

韓世忠改授顯謨閣直學士孟忠厚為常德軍承宣使
詔凡后族毋任侍從官著為令金人焚鄧州是月以中
奉大夫劉豫知濟南府金人陷潁昌府守臣孫默為所
殺經制司僚屬王擇仁復永興軍金人陷秦州經略使
李復降又犯熙河經略使張深遣兵馬都監劉惟輔與
戰于新店敗之斬其帥黑鋒二月丙辰金人再犯東京
宗澤遣統制閻中立等拒之中立戰死戊午移耿南仲
于臨江軍金人陷唐州壬戌安化軍節度副使宇文虛

中應詔使絕域復中大夫召赴行在癸亥罷市易務甲子金人犯滑州宗澤遣張撝救之戰死乙丑澤遣判官范世延等表請帝還闕河北賊楊進等詣澤降丁卯復延康述古殿直學士為端明樞密直學士辛未詔自今犯枉法自盜贓罪至死者籍其貲壬申赦福州叛卒張員等癸酉金人陷蔡州執守臣閻孝忠丙子金人陷淮寧府守臣向子韶死之丁丑遣王貺等充金國軍前通問使戊寅責降知鎮江府趙子崧為單州團練副使南

雄州安置己卯奪祕書正字胡珵官送梧州編管朝奉
大夫劉正彥應詔使絕域授武德大夫威州刺史尋為
御營右軍副統制庚申以王淵為嚮德軍節度使辛巳
武功大夫和州防禦使馬擴奔真定五馬山砦聚兵得
皇弟信王榛于民間奉之總制諸砦壬午詔京畿京東
西河北淮南路置振華軍八萬人是月成都守臣盧法
原修城成三月辛卯金人陷中山府壬辰詔諸路安撫
使許便宜節制官吏丁酉初立大小使臣呈試弓馬出

官格先閱試然後奏補粘罕焚西京去庚子河南統制
官翟進復西京宗澤奏進為京西北路安撫制置使丙
午遙授尚書右僕射何鼎為觀文殿大學士中書侍郎
陳過庭為資政殿大學士同知樞密院事鼎昌為資政
殿大學士並主管宮觀時鼎已卒于金昌為人所殺朝
廷未之知過庭亦在金軍中丁未罷內外權局官之不
應法者遣楊應誠為大金高麗國信使己酉張員等復
作亂擁眾突城出命本路提點刑獄李芑討捕之辛亥

以范瓌權同主管侍衛步軍司公事屯真州是月金人陷鳳翔府守臣劉清臣棄城去又犯涇原經略使曲端遣將拒戰敗之金兵走同華石壕尉李彥仙舉兵復陝州夏四月丙辰詔文臣從官至牧守武臣管軍至遙郡各舉所知二人戊午禁州縣責鄰保代輸逃戶稅役宗澤遣將趙世興復滑州乙丑翟進以兵襲金帥兀室于河南兵敗其子亮死之進又率御營統制韓世忠京城都巡檢使丁進等兵戰于文家寺又敗世忠收餘兵南

歸兀室復入西京尋棄去隴右都護張嚴及金人戰于五里坡敗績死之丁卯金人入洛州壬辰軍賊孫琦焚隨州癸未入唐州信王榛遣馬擴來奏事是月以榛為河外兵馬都元帥擴為元帥府馬步軍都總管五月乙酉許景衡罷孫琦犯德安府丙戌命參酌元祐科舉條制立詩賦經義分試法戊子以翰林學士朱勝非為尚書右丞辛卯以金兵渡河遣韓世忠宗澤等逆戰甲午曲赦河北陝西京東路福建轉運判官謝如意執張員

等六人誅之丙申復命宇文虛中為資政殿大學士充
金國祈請使賊靳賽寇光山縣戊戌河北制置使王彥
部兵渡河屯滑州之沙店癸卯張懋薨甲辰金帥婁宿
陷絳州丁未復置兩浙福建提舉市舶司己酉秀州卒
徐明等作亂執守臣朱芾迎前守趙叔近復領州事命
御營中軍統制張俊討之癸丑罷借諸路職田六月乙
卯邛州鑄錢增印錢引癸亥建州卒葉濃等作亂寇福
州甲子親慮囚乙丑張俊至秀州殺趙叔近執徐明斬

之甲戌葉濃陷福州丁丑詔江浙沿流州軍練水軍造
戰艦京畿淮甸蝗是月以知延安府王庶節制陝西六
路軍馬涇原經略使曲端為節制司都統制永興軍經
略使郭瑛逐王擇仁擇仁奔興元秋七月甲申葉濃入
寧德縣復還建州命張俊同兩浙提點刑獄趙哲率兵
討之丙戌詔吏部審量京官非政和以後進書頌及直
赴殿試人乃聽參選宗澤薨丁亥詔百官坐蔡京王黼
擬授而廢者許自新復用戊子禁軍中抉目剗心之刑

壬辰選江浙州軍正兵土兵六之一赴行在乙未以郭
仲荀為京城副留守戊戌錄內外諸軍將士功辛丑以
春霖夏旱蝗詔監司郡守條上闕政州郡災甚者蠲田
賦甲辰以降授北京留守杜充復樞密直學士為開封
尹東京留守八月甲寅初鑄御寶三甲戌御集英殿策
試禮部進士罷殿中侍御史馬伸尋責濮州河北京東
捉殺使李成叛辛巳犯宿州是月二帝徙居韓州九月
甲申丁進叛復寇淮西庚寅賜禮部進士李易以下四

百五十一人及第出身特奏名進士皆許調官壬辰召侍從所舉褚宗諤等二十一人驛赴行在癸巳金人陷冀州將官李政死之甲午金人再犯永興軍經略使郭琰棄城退保義谷辛丑陝西節制司兵官賀師範及金人戰于八公原敗績死之丙午復所滅京官奉丁未東京留守統制官薛廣及金人戰于相州敗死己酉郭三益薨是秋窩里咄撻懶破五馬山砦信王榛不知所終馬擴軍敗于北京之清平冬十月甲寅命揚州濬隍修

城閱江淮州郡水軍楊應誠還自高麗戊午遣劉光世討李成壬戌禁江浙閉糴癸亥粘罕圍濮州遣韓世忠范瓊領兵至東平開德府分道拒戰又命馬擴援之甲子命孟忠厚奉隆祐太后幸杭州楊進復叛攻汝洛命翟進擊于鳴皋山翟進戰死丙子罷吏部審量崇寧大觀以來濫賞止令自陳是月劉正彥擊丁進降之十一月辛巳朔提舉嵩山崇福宮李綱責授單州團練副使萬安軍安置劉光世及李成戰于新息縣成敗走高麗

國王王楷遣其臣尹彥頤入見金人圍陝州守臣李彥
仙拒戰卻之壬辰金人陷延安府權知府劉選總管馬
忠皆遁通判府事魏彥明死之癸巳趙哲大破葉濃于
建州城下濃遁而降復謀為變張俊禽斬之乙未金人
陷濮州執守臣楊粹中又陷開德府守臣王棣死之以
魏行可充金國軍前通問使庚子詣壽寧寺朝饗祖宗
神主壬寅冬至祀昊天上帝于圜丘以太祖配大赦金
人陷相州守臣趙不試死之甲辰陷德州兵馬都監趙

叔販死之庚戌立士庶子弟習射補官法是月節制陝西軍馬王庶為都統制曲端所拘奪其印四川茶馬趙開罷官買賣茶給引通商如政和法金人犯晉寧軍守臣徐徽言拒卻之知府州折可求以城降金人陷淄州涇原兵馬都監吳玠襲斬史斌濱州賊蓋進陷棣州守臣姜剛之死之京東賊李民詣行在請降王淵殲其衆留民為將十二月乙卯太后至杭州扈從統制苗傅以其軍八千人駐奉國寺庚申金人犯東平府京西路制

置使權邦彥棄城去又犯濟南府守臣劉豫以城降甲子金人陷大名府提點刑獄郭永罵敵不屈死之轉運判官裴億降又陷襲慶府乙丑陷號州丙寅初命修國史已巳以黃潛善為尚書左僕射兼門下侍郎汪伯彥右僕射兼中書侍郎顏岐門下侍郎朱勝非中書侍郎兵部尚書盧益同知樞密院事辛未金人犯青州丁丑特進致仕余深金紫光祿大夫致仕薛昂並分司進昌軍徽州居住耿南仲再責單州別駕唐恪追落觀文殿

大學士戊寅以禮部侍郎張浚兼御營參贊軍事教習
長兵是冬杜充決黃河自泗入淮以阻金兵

三年春正月庚辰朔帝在揚州以京西北路兵馬鈐轄
翟興為河南尹京西北路安撫制置兼招討使京西賊
貴仲正陷岳州甲申以資政殿學士路允迪簽書樞密
院事丁亥金人再陷青州又陷濰州焚城而去京東安
撫劉洪道入青州守之己丑奉安西京會聖宮累朝御
容于壽寧寺占城國入貢趣大金通問使李鄴周望宋

彥通吳德休等往軍前辛卯陝州都統邵興及金人戰于潼關敗之復虢州乙未杜充遣岳飛桑仲討其叛將張用于城南其徒王善救之官軍敗績庚子張用王善寇淮寧府守臣馮長寧却之詔百官聞警遣家屬避兵致物情動搖者流丙午黏罕陷徐州守臣王復及子倚死之軍校趙立結鄉兵為興復計御營平寇左將軍韓世忠軍潰于沭陽其將張遇死世忠奔鹽城金兵執淮陽守臣李寬殺轉運副使李跋以騎兵三千取彭城間

道趣淮甸戊申至泗州二月庚戌朔始聽士民從便避
兵命劉正彥部兵衛皇子六宮如杭州江淮制置使劉
光世阻淮拒金人敵未至自潰金人犯楚州守臣朱琳
降辛亥金人陷天長軍壬子內侍鄺詢報金兵至帝被
甲馳幸鎮江府是日金兵過楊子橋癸丑游騎至瓜洲
太常少卿李陵奉太廟神主行金兵追之失太祖神主
王淵請幸杭州命留朱勝非守鎮江以吏部尚書呂頤
浩為資政殿大學士江淮制置使都巡檢使劉光世為

殿前都指揮使充行在五軍制置使駐鎮江府控扼江
口主管馬軍司楊惟忠節制江東軍馬駐江寧府是夕
發鎮江次呂城鎮金人入真州甲寅次常州御營統制
王亦謀據江寧不克而遁御營平寇前將軍范瓊自東
平引兵至壽春其部兵殺守臣鄧紹密丙辰次平江府
丁巳金人犯泰州守臣曾班以城降丁進縱兵剽掠王
淵誘誅之戊午次吳江縣命朱勝非節制平江府秀州
控扼軍馬禮部侍郎張浚副之又命勝非兼御營副使

留王淵守平江以忠訓郎劉俊民為閣門祗候齋書使
金軍詔錄用張邦昌親屬仍命俊民持邦昌貽金人約
和書藁以行金人陷滄州守臣劉錫棄城走己未次秀
州命呂頤浩往來經制長江以龍圖閣待制知江州陳
彥文為沿江措置使庚申次崇德縣呂頤浩從行即拜
同簽書樞密院事江淮兩浙制置使以兵二千還屯京
口又命御營中軍統制張俊以兵八千守吳江吏部員
外郎鄭資之為沿江防托監察御史林之平為沿海防

托募海舟守隘壬戌駐蹕杭州金人陷晉寧軍守臣徐
徽言死之癸亥下詔罪已求直言令有司具舟常潤迎
濟衣冠軍民家屬省儀物膳羞出宮人之無職掌者乙
丑降德音赦雜犯死罪以下囚放還士大夫被竄斥者
惟李綱罪在不赦更不放還蓋用黃潛善計罪綱以謝
金人置江寧府權貨務都茶場丁卯百官入見應迪功
郎以上並赴朝參戊辰出米十萬斛即杭秀常湖州平
江府損直以糶濟東北流寓之人金人焚揚州已巳用

御史中丞張澂言罷黃潛善汪伯彥以戶部尚書葉夢
得為尚書左丞澂為右丞庚午詔平江鎮江府常湖杭
越州具寓居京朝官已上姓名以備簡拔分命浙西監
司等官募土豪守千秋垂脚襄陽諸嶺以扼宣常諸州
險要金人去揚州辛未詔御營使司唯掌行在五軍凡
邊防經制並歸三省樞密金人過高郵軍守臣趙士瑗
棄城走潰兵宋進犯泰州守臣曾班遁壬申罷軍期司
掊歛民財者呂頤浩遣將陳彥渡江襲金餘兵復揚州

癸酉靳賽犯通州韓世忠小校李在叛據高郵甲戌黃
潛善汪伯彥並落職乙亥召朱勝非赴行在留張浚駐
平江贈陳東歐陽澈承事郎官有服親一人恤其家召
馬伸赴行在卒贈直龍圖閣丙子詔士民直言時政得
失是月以王庶為陝西節制使知京兆府節制司都統
制曲端為鄜延經略使知延安府張用據確山號張莽
蕩三月己卯朔日中有黑子庚辰以朱勝非為尚書右
僕射兼中書侍郎辛巳葉夢得罷以盧益為尚書左丞

未拜復罷為資政殿學士御營都統制王淵同簽書樞密院事呂頤浩為江南東路安撫制置使知江寧府壬午詔王淵免進呈書押本院文字扈從統制苗傅忿王淵驟得君劉正彥怨招降劇盜而賞薄帝在揚州闕官用事恣橫諸將多疾之癸未傅正彥等叛勒兵向闕殺王淵及內侍康履以下百餘人帝登樓以傅為慶遠軍承宣使御營使司都統制正彥渭州觀察使副都統制傅等迫帝遜位于皇子魏國公請隆祐太后垂簾同聽

政是夕帝移御顯寧寺甲申尊帝為睿聖仁孝皇帝以
顯寧寺為睿聖宮大赦以張洎兼中書侍郎韓世忠為
御營使司提舉一行事務前軍統制張俊為秦鳳副總
管分其衆隸諸軍丁亥以東京留守杜充為資政殿大
學士節制京東西路殿前副都指揮使東京副留守郭
仲荀進昭化軍節度使分竄內侍藍珪高邈張去為張
旦曾擇陳永錫于嶺南諸州擇已行傳追還殺之呂頤
浩至江寧戊子以端明殿學士王孝迪為中書侍郎盧

益為尚書左丞張俊部衆八千至平江張浚諭以決策起兵問罪約呂頤浩劉光世招韓世忠來會己丑改元明受張浚奏乞睿聖皇帝親總要務庚寅百官始朝睿聖宮以苗傅為武當軍節度使劉正彥為武成軍節度使劉光世為太尉淮南制置使范瓊為慶遠軍節度湖北制置使楊惟忠加少保張浚為禮部尚書及呂頤浩並赴行在傅等以御營中軍統制吳湛主管步軍司黃潛善汪伯彥並分司衡永州居住王孝迪盧益為大金

國信使進士黃太本吳時敏為先期告請使置行在都
茶場呂願浩奏請睿聖皇帝復大位金人陷鄜州癸巳
張浚命節制司參議官辛道宗措置海舶遣布衣馮輻
持書說傳正彥甲午有司請尊太后為太皇太后不許
呂願浩率勤王兵萬人發江寧乙未再貶黃潛善鎮東
軍節度副使英州安置劉光世部兵會呂願浩于丹陽
丙申韓世忠自鹽城收散卒至平江張浚假兵二千戊
戌赴行在辛丑傳等以世忠為定國軍節度使張浚為

武寧軍節度使知鳳翔府張浚責黃州團練副使郴州安置俊等皆不受傳等遣軍駐臨平拒勤王兵壬寅日中黑子沒盧益罷呂頤浩至平江水賊邵青入泗州癸卯太后詔睿聖皇帝宜稱皇太弟天下兵馬大元帥康王皇帝稱皇太姪監國賜傳正彥鐵券呂頤浩張浚傳檄中外討傳正彥執黃太本下獄乙巳太后降旨睿聖皇帝處分兵馬重事張浚率兵發平江劉光世繼之丙午張浚同知樞密院事翰林學士李邴御史中丞鄭穀

並同簽書樞密院事呂頤浩張浚發平江丁未次吳江
奏乞建炎皇帝還即尊位朱勝非召傅正彥至都堂議
復辟傅等遂朝睿聖宮金人陷京東諸郡劉洪道棄青
州去槿懶以劉豫知東平府節制河南州郡趙立復徐
州夏四月戊申朔太后下詔還政皇帝復大位帝還宮
與太后御前殿垂簾詔尊太后為隆祐皇太后己酉詔
訪求太祖神主以苗傅為淮西制置使劉正彥副之庚
戌復紀年建炎命張浚知樞密院事苗傅劉正彥並檢

校少保呂頤浩張浚軍次臨平苗翊馬柔吉拒戰不勝
傅正彥引兵二千夜遁辛亥皇太后撤簾呂頤浩等入
見傅犯富陽新城二縣遣統制王德喬仲福追擊之癸
未朱勝非顏岐王孝迪張浚路允迪俱罷以呂頤浩為
尚書右僕射兼中書侍郎李邴尚書右丞鄭穀簽書樞
密院事甲寅以劉光世為太尉御營副使韓世忠為武
勝軍節度使御前左軍都統制張俊為鎮西軍節度使
御前右軍都統制勤王所僚屬將佐進官有差主管殿

前司王元左言並責官英賀州安置樞密都承旨馬瑗
傳官永州居住吏部員外郎范仲熊浙西安撫司主管
機宜文字時希孟並除名柳州吉陽軍編管斬中軍統
制吳湛工部侍郎王世修于市贈王淵開府儀同三司
乙卯大赦舉行仁宗法度應嘉祐條制與今不同者自
官制役法外賞格從重條約從寬罷上供不急之物元
祐石刻黨人官職恩數追復未盡者令其家自陳許中
外直言丁巳禁內侍交通主兵官及饋遺假貸借役禁

兵干預朝政庚申詔尚書左右僕射並帶同中書門下
平章事改門下中書侍郎為參知政事省尚書左右丞
以李邴參知政事詔行在職事官各舉所知併省館學
寺監等官苗傅犯衢州癸亥以給事中周望為江浙制
置使丁卯帝發杭州留鄭穀衛皇太后以韓世忠為江
浙制置使及劉光世追討傅正彥已巳詔傅正彥苗端
苗翊張達不赦餘黨並原壬申立于魏國公塲為皇太
子赦傅黨王鈞甫馬柔吉罪許其自歸丙子范瓊自光

斬引兵屯洪州是月劉文舜寇濠州西北賊薛慶襲據
高郵軍五月戊寅朔帝次常州以張浚為宣撫處置使
以川陝京西湖南北路隸之聽便宜黜陟庚辰苗傅統
領官張翼斬王鈞甫馬柔吉降辛巳次鎮江府遣祭張
慤陳東墓詔恤其家癸未以翰林學士滕康同簽書樞
密院事乙酉至江寧府駐蹕神霄宮改府名建康起復
朝散郎洪皓為大金通問使丁亥以徽猷閣直學士陳
彥文提領水軍措置江浙防托召藍珪等速還朝己丑

韓世忠追討傅正彥于浦城縣獲正彥傅遁走張浚撫諭薛慶于高郵為慶所留乙未浚罷以御營前軍統制王玘為淮南招撫使己亥復置中書門下省檢正官省左右司郎中二員苗傅裨將江池殺苗翊降于周望傅走建陽縣土豪詹標執之以獻辛丑張浚還自高郵復命知樞密院事是月翟興擊殺楊進餘黨復推其徒劉可拒官軍六月戊申朔以東京留守杜充引兵赴行在命兼宣撫處置副使節制淮南京東西路已酉以久雨

召郎官已上言闕政呂頤浩請令實封以聞遂用司勳
員外郎趙鼎言罷王安石配享神宗廟庭以司馬光配
王善攻淮寧府不克轉寇宿州統領王冠戰敗之甲寅
罷賞功司乙卯命恤死事者家且錄其後升浙西安撫
使康允之為制置使丙辰劉光世招安苗傅將韓雋戊
午命江浙淮南引塘濠開畝澮以阻金兵庚申皇太后
至建康府辛酉以久陰下詔以四失罪己一曰昧經邦
之大略二曰昧戡難之遠圖三曰無綏人之德四曰失

馭臣之柄仍榜朝堂徧諭天下使知朕悔過之意以帶御器械李質權同主管殿前司乙丑以建康府路安撫使連南天兼建康府宣徽太平等州制置使丁卯右司諫袁植請誅黃潛善及失守者權邦彥等九人詔朕方念咎責已豈可盡以過失歸於臣下遂罷植知池州以趙鼎為右司諫癸酉置樞密院檢詳官以右司郎中劉寧止為沿江措置副使甲戌移御行宮乙亥詔諭中外以迫近防秋請太后率宗室迎奉神主如江表百司庶

府非軍旅之事者並令從行朕與輔臣宿將備禦寇敵
應接中原官吏民士家屬南去者有司毋禁金人陷磁
州是夜賊貴仲正降秋七月戊寅贈王復為資政殿學
士己卯親慮囚辛巳苗傅劉正彥伏誅癸未進韓世忠
檢校少保武勝昭慶軍節度使御營使司都統制范瓊
自洪州入朝以瓊為御營使司提舉一行事務後軍統
制辛企宗為都統制命學士院草夏國書大金國表本
付張浚甲申詔以苗劉之變當軸大臣不能身衛社稷

朱勝非顏岐路允迪並落職張澂衡州居住以知廬州
胡舜陟為淮西制置使知江州權邦彥兼本路制置使
金人犯山東安撫使劉洪道棄濰州遁萊州守將張成
舉城降丁亥以范瓊跋扈無狀收下大理獄分其兵隸
神武五軍皇太子薨謚元懿戊子鄭穀薨己丑以資政
殿大學士王絢參知政事兵部尚書周望同簽書樞密
院事庚寅仙井監鄉貢進士李時雨上書乞選立宗子
係屬人心帝怒斥還鄉里辛卯升杭州為臨安府壬辰

言者又論范瓊逼遷徽宗及迎立張邦昌瓊辭伏賜死
子弟皆流嶺南劉洪道復青州執金守向大猷乙未遣
謝亮使夏國丁酉遣崔縱使金軍前庚子張浚發行在
辛丑王玠與靳賽遇合戰敗績壬寅命李邴滕康權知
三省樞密院事扈從太后如洪州楊惟忠將兵萬人以
衛以杜充同知樞密院事兼宣撫處置副使乙巳詔江
西閩廣荆湖諸路團教峒丁槍杖手山東賊郭仲威陷
淮陽軍翟興引兵入汝州與賊王俊戰敗之八月己酉

移浙江安撫司于鎮江府庚戌李邴罷壬子以吏部尚書劉珏為端明殿學士權同知三省樞密院事甲寅王庶罷以徽猷閣直學士知慶陽府王似為陝西節制使劉文舜入舒州己未太后發建康丁卯遣杜時亮使金軍前閏八月丁丑朔以胡舜陟為沿江都制置使集英殿修撰王羲叔副之丁亥輔達掠連水軍殺軍使郝璘率衆降于王夔己丑以呂頤浩守尚書左僕射杜充守右僕射並同中書門下平章事庚寅起居郎胡寅上書

言二十事呂頤浩不悅罷之辛卯命杜充兼江淮宣撫使守建康前軍統制王玘隸之韓世忠為浙西制置使守鎮江劉光世為江東宣撫使守太平池州並受充節制丁酉太后至洪州己亥減福建廣南歲上供銀三一詔制置使唯用兵聽便宜餘事悉禁壬寅帝發建康復還浙西張俊辛企宗以其軍從甲辰次鎮江府賜陳東家金張浚次襄陽招官軍義兵分屯襄郢唐鄧以程千秋李允文節制是月知濟南府宮儀及金人數戰于

密州兵潰儀及劉洪道俱奔淮南守將李達以密州降
金靳賽詣劉光世降九月丙午朔日有食之諜報金人
治舟師將由海道窺江浙遣韓世忠控守圖山福山辛
亥次平江府壬子金人陷單州興仁府遂陷南京執守
臣凌唐佐降之癸丑以周望為兩浙荆湖等路宣撫使
總兵守平江翰林學士張守同簽書樞密院事命劉光
世移屯江州丙辰遣張邵等充金國軍前通問使金人
陷沂州却高麗入貢使張浚承制罷知潭州辛炳起復

直龍圖閣向子諲代之丁巳蠲諸路青苗積欠錢辛酉
知鼎州邢倬坐結耶律余覲再責汝州團練副使英州
安置癸亥賜宿泗州都大提舉使李成軍絹二萬匹成
尋復叛己巳以胡舜陟為宣撫司參謀官知鎮江府陳
邦光為沿江都制置使庚午以工部侍郎湯東野知平
江府兼浙西制置使辛未追復鄒浩龍圖閣待制壬申
夜潭州禁卒作亂謀竄不果向子諲隨招安之甲戌金
帥婁宿犯長安經略使郭瑱棄城遁河北賊酈瓊圍光

州冬十月丙子朔詔按察官歲上所發摘賊吏姓名以
為殿最庚辰禁諸軍擅入川陝癸未帝至杭州復如浙
東庚寅渡浙江郭仲威詣周望降望以仲威為本司統
制辛卯李成陷滁州殺守臣向子伋壬辰帝至越州癸
巳命提舉廣西峒丁李棫市馬邕州置牧養務戊戌初
命東南八路歲收經制五項錢輸行在張浚治兵于興
元府金人陷壽春府庚子陷黃州守臣趙令歲死之辛
丑張浚以同主管川峽茶馬趙開為隨軍轉運使專總

行至詔奉安於天慶觀尋命勅節制淮西軍馬以拒金人甲子杜克遣都統制陳淬岳飛等及金人戰於馬家渡王瓚以軍先遁淬敗績死之乙丑以檢正諸房公事傅崧卿為浙東防遏使太后發吉州次太和縣護衛統制杜彥及後軍楊世雄率衆叛犯永豐縣知縣事趙訓之死之金人至太和縣太后自萬安陸行如虔州丁卯十詔回浙西迎敵金人犯吉州守臣楊淵棄城走又陷六安軍己巳帝發越州次錢清鎮庚午復還越州以周

望同知樞密院事仍兼兩浙宣撫使守平江殿前都指揮使郭仲荀為副使守越州右軍都統制張俊為浙東制置使從行御史中丞范宗尹叅知政事辛未兀朮入建康府守臣陳邦光戶部尚書李稅迎拜通判楊邦乂拒之癸酉帝如明州金人犯建昌軍兵馬監押蔡延世擊却之甲戌兀朮殺楊邦乂韓世忠自鎮江引兵之江陰軍江淮宣撫司潰卒李選攻陷鎮江淮西兵馬都監王宗望以濠州降於金是月張浚至秦州桑仲自唐州

四川財賦金人自黃州濟江劉光世引軍遁知江州韓
杞棄城去金人自大冶縣趨洪州是月京西賊劉滿陷
信陽軍殺守臣趙士負盜入宿州殺通判盛修已十一
月乙巳朔金人犯廬州守臣李會以城降王善叛降金
金人執之丁未詔降雜犯死罪釋流以下囚聽李綱自
便追復宋齊愈官貴仲正犯荆南兵馬鈐轄渠成與戰
斬之戊申金帥兀朮犯和州守臣李儔以城降通判唐
璟死之己酉張浚出行關陝兀朮陷無為軍守臣李知

幾棄城走壬子太后退保虔州江西制置使王子獻棄
洪州走丁巳金人陷臨江軍守臣吳將之遁戊午遣孫
悟等克金國軍前致書使金人陷洪州權知州事李積
中以城降撫袁二州守臣王仲山王仲疑皆降淮賊劉
忠犯蘄州韓世清逆戰破之忠入舒州殺通判孫知微
庚申金人陷真州守臣向子志棄城去辛酉太后至吉
州壬戌金人犯建康府陷溧水縣尉潘振死之癸亥金
人陷太平州主管步軍司閻勅自西京奉累朝御容至

犯襄陽京西制置使程千秋敗走仲遂據襄陽十二月
乙亥朔張浚承制廢積石軍丙子帝至明州丁丑江淮
宣撫司準備將戚方擁衆叛犯鎮江府殺守臣胡唐老
辛巳金人陷常州守臣周杞遣赤心隊官劉宴擊走之
陷廣德軍殺守臣周烈劉光世引兵趨南康軍壬午定
議航海避兵禁卒張寶等憚行謀亂命呂頤浩等伏兵
執寶等十七人斬之甲申張浚承制拜涇原經畧使曲
端為威武大將軍宣撫處置使司都統制乙酉兀朮犯

臨安府守臣康允之棄城走錢塘縣令朱蹕死之己丑
帝乘樓船次定海縣給行在諸軍雪寒錢辛卯留范宗
尹趙鼎於明州以候金使癸巳帝次昌國縣乙未杜彥
犯潭州殺通判孟彥卿趙民彥金人屠洪州戊戌金人
犯越州安撫使李鄴以城降衛士唐琦袖巨石要擊金
帥琶八不克死之郭仲荀棄軍奔溫州庚子移幸溫台
癸卯黃潛善卒於英州李成自滁州引兵之淮西

宋史卷二十五

宋史卷二十五考證

高宗紀二建炎三年壬子內侍鄺詢報金兵至帝被甲

馳幸鎮江府○

臣宗楷

按揮塵錄金人舉國南寇太

上駐蹕淮揚相距甚邇有招信尉以所部百餘人拒敵是日塵氛蔽日探騎得疾走乘輿百僚僅得南渡尉之姓名不傳於世或云姓孫

壬戌駐蹕杭州○

臣宗楷

按錢塘遺事宋太祖次陳橋

從仁和門入高宗過杭問縣名仁和喜曰此京師門

名也遂駐蹕於此

卷二十五考證

宋史卷二十五考證

欽定四庫全書

宋史卷二十六

元中書右丞相總裁托克托等修

本紀第二十六

高宗三

四年春正月甲辰朔御舟碇海中乙巳金人犯明州張
俊及守臣劉洪道擊却之丙午帝次台州章安鎮己酉
遣小校自海道如處州問安太后庚戌金人再犯明州

張俊引兵去浙東副總管張思政及劉洪道繼遁癸丑
貶郭仲荀汝州團練副使廣州安置丙辰詔原兩浙州
郡降金官吏丁巳婁宿陷陝州守臣李彥仙死之己未
金人陷明州夜大雨震電乘勝破定海以舟師來襲御
舟張公裕以大舶擊退之辛酉發章安鎮壬戌雷雨又
作甲子泊溫州港口乙丑以中書舍人李正民為兩浙
湖南江西撫諭使詣太后問安丁卯台州守臣晁公為
棄城遁處州衛兵及鄉兵相殺縱火肆掠三日劉可轉

寇京西屢為桑仲所敗至是為其黨所殺復推劉超據
荆門軍戊辰滕康劉珪罷仍奪職己巳換給僧道度牒
人輸錢十千辛未命臣僚條具兵退之後措置之策駐
蹕之所是月金人攻楚州守臣趙立拒之金人犯邠州
曲端遣涇原路副總管吳玠拒戰敗之于彭原又陷同
州張淡遣謝亮使夏國至則其主乾順己稱制遂還二
月甲戌朔鄴瓊率眾降于劉光世叛將傅選詣處州乞
降乙亥奉安祖宗神御于福州詔復以盧益為資政殿

學士李回端明殿學士並權知三省樞密院事金人陷
潭州將吏王暕劉价趙聿之戰死向子諲率兵奪門亡
去金兵大掠屠其城丙子金人自明州引兵還臨安癸
未虔州鄉兵首領陳新率衆數萬圍城叛將胡友亦犯
虔州與新戰破之新乃去甲申禁遜卒投刺別軍丙戌
金人自臨安退兵命劉光世率兵追之丁亥金人陷汴
京權留守上官悟出奔為盜所殺庚寅帝次溫州浙東
防遏使傅崧卿入越州辛卯金人陷秀州甲午知蔡州

程昌寓棄城南歸鼎州民鍾相作亂自稱楚王乙未杜克罷丙申以金兵退肆赦張浚承制以陝西制置使王似知成都府罷諸路武臣提點刑獄李成入舒州金游騎至平江周望奔太湖守臣湯東野亦遁茶陵縣軍賊二千餘人犯郴州永興縣戊戌金人入平江縱兵焚掠辛丑白虹貫日鍾相陷澧州殺守臣黃宗權湖北制置使傅雱招諭孔彥舟彥舟聽命因以為湖南北捉殺使荆南守臣唐慤棄城去金人陷醴州守臣王淑棄城去

是月張浚自秦州引兵入援三月癸卯朔孔彥舟入鼎
州金人去平江統制陳思恭以舟師邀敗其後軍于太
湖呂頤浩請幸浙西丙午趙鼎言金兵去未遠遂緩其
行丁未命發運司說諭兩浙富民助米以備巡幸辛亥
遣兵部員外郎馮康國等撫諭荆湖南北廣南諸路壬
子金人入常州守臣周杞棄城去甲寅遣盧益及御營
都統制辛企宗奉迎太后東還丙辰金人犯終南縣經
略使鄭恩戰敗死之丁巳金人至鎮江府韓世忠屯焦

山寺邀擊之詔侍從官各舉可充監司者一二人辛酉
御舟發溫州宣撫司節制軍馬李允文部兵至鄂州御
營前軍將楊勅叛甲子張浚請便宜辟官不許動改戊
辰孔彥舟擊敗鍾相擒相及其子子昂檻送行在己巳
戚方陷廣德軍殺權通判王儔夏四月癸酉蠲江西州
縣兵盜殘破民家夏稅戊寅吳玠及金人戰于邠州彭
原店敗績部將楊晟死之己卯以觀文殿學士朱勝非
為江西湖南北宣撫使是日張浚引兵至房州知金兵

退乃還癸未帝駐越州甲申下詔親征巡幸浙西韓世忠駐軍楊子江要金人歸路屢敗之兀朮引軍走建康乙酉以御史中丞趙鼎為翰林學士鼎固辭不拜戚方圍宣州劉光世遣統制王德誘誅劉文舜于饒州丙申用趙鼎劾奏呂頤浩罷為鎮南軍節度使醴泉觀使命三省樞密院同班奏事韓世忠及兀朮再戰江中金人乘風縱火世忠敗績兀朮渡江屯六合縣丁酉復以趙鼎為御史中丞戊戌振明州被兵民家己亥以張浚為

浙西江東制置使辛丑王德破妖賊王宗石于信州貴
溪縣執其渠帥諸縣悉平是月金人犯江西者自荆門
軍北歸留守司同統制牛皋潛軍寶豐擊敗之五月甲
辰以范宗尹為尚書右僕射兼御營使辛亥統領赤心
隊軍馬劉晏及戚方戰于宣州敗死壬子金人焚建康
府執李祝陳邦光而去淮南宣撫司統制岳飛邀擊于
靜安鎮敗之是月紫微垣内有赤雲亘天白氣貫其中
癸丑詔臺諫等官各舉所知二人以張守參知政事趙

鼎簽書樞密院事以白金三萬兩賜韓世忠軍贈戰歿將孫世詢嚴永吉張淵等官甲寅金人陷定遠縣執問勅去勅不屈死之巨師古擊戚方于宣州數敗之方引去乙卯王綯罷丁巳命劉光世移軍捕戚方楊勅犯發州戊午復置權尚書六部侍郎癸亥詔中原淮南流寓士人聽所在州郡附試甲子周望罷尋分司衡州居住置京畿淮南北京東西路鎮撫使乙丑升高郵軍為承州以翟興孟汝趙立劉位趙霖李成吳翊李彥先薛

慶並為鎮撫使興河南府汝唐州立楚泗州漣水軍位
滁濠州霖和州無為軍成舒蘄翊光黃州彥先海州淮
陽軍慶永州天長軍丁卯慶及金人戰于承州城下累
敗之戊辰命江浙州縣祭戰死兵民分江東西為鄂州
江州池州三路置安撫使罷諸路帥臣兼制置使諸州
守臣兼管內安撫使是月劉超據荆南分兵犯峽州又
合叛將彭筠犯復州淮西敗將崔增陷焦湖水砦河東
北經制使王俊舉兵及金人戰于襄城縣敗之復潁昌

府張浚承制以金房州隸利路六月辛未朔蠲紹興府
三縣湖田米詔侍從臺諫諸將集議駐蹕事宜楊勅犯
處州癸酉遣統制陳思恭討勅合江南兩路轉運為都
轉運使再貶周望昭化軍節度副使連州安置甲戌罷
御營司以范宗尹兼知樞密院事乙亥王玠遣統領林
閏等追襲楊勅于東陽縣軍敗裨將李在死之丁丑以
劉光世部兵為御前巡衛軍光世為都統制楊勅等焚
建州戚方犯湖州安吉縣詔張俊捕之戊寅更御前五

軍為神武軍御營五軍為神武副軍以知建康府權邦
彥為淮南等路制置發運使滁濠鎮撫使劉位為賊張
文孝所殺命其子綱襲職庚辰置鎮撫使六人陳規德
安府復州漢陽軍解潛荆南府歸陝州荆門公安軍程
昌寓鼎澧州陳求道襄陽府鄧隨郢州范之才金筠房
州馮長寧淮寧順昌府蔡州辛巳慮囚申命有司討論
釐正崇寧以來濫賞罷諸州添差通判職官癸未詔劉
光世赴行在甲申岳飛破戚方于廣德軍乙酉鍾相偽

將胡源引兵入慈利縣執其黨陳誠來降丙戌以呂頤
浩為建康路安撫大使劉光世為兩浙路安撫大使朱
勝非為江州路安撫大使郭仲威為真揚州鎮撫使戚
方詣張俊降庚寅召韓世忠率兵赴行在辛卯妖賊王
宗石等伏誅壬辰權密州都巡檢徐文率部兵泛海來
歸甲午置樞密院幹辦官四員乙未郭仲威犯鎮江府
遣岳飛擊之是月兀朮聞張浚在秦州將舉兵北伐自
六合引兵趨陝西秋七月癸卯劉光世援宣撫使例乞

便宜行事不許詔軍興以來諸州得便宜指揮者並罷
乙巳馮長寧復順昌府張浚罷曲端都統制丁未以劉
光世為集慶軍節度使開府儀同三司戊申以孔彥舟
為辰沅靖州鎮撫使張浚獻黃金萬兩助軍用宣撫司
遣統制官呂世存王俊復廊州其餘州縣多迎降後軍
將王闢叛陷歸州鈐轄田祐恭擊敗之己酉王闢犯房
州守臣韋知幾棄城走庚戌楊勍受劉光世招安尋復
叛去迫泉州癸丑崔增犯太平州守臣郭偉拒却之乙

卯金人徙二帝自韓州之五國城劉光世乞移司平江
不許丙辰張俊合諸將戚方等兵萬餘赴行在丁巳申
命元祐黨人子孫于州郡自陳盡還當得恩數韓世忠
張俊並罷己未禁閩廣淮浙海舶商販山東慮為金人
鄉導詔江浙福建州縣諭豪右募民兵據險立柵防遏
外寇庚申以岳飛為通泰州鎮撫使辛酉建州民范汝
為作亂命統制李捧捕之乙酉復李邦彥以下十九人
官職聽自便復李綱銀青光祿大夫許翰顏岐端明殿

學士張浚貶曲端階州居住丁卯金人立劉豫為帝國
號齊戊辰罷提領措置茶鹽司己巳詔王瓊部兵屯信
州程昌寓遣將杜湛禽李合戎于松滋縣是月張用據
漢陽軍沿江措置副使李允文招降之以便宜徙鄂州
路副總管以右軍統制馬友知漢陽軍八月辛未朔以
禮部尚書謝克家參知政事壬申李成請降于江州詔
撫納之張浚停程千秋官文州編管癸酉選神武中軍
親兵六百人番直禁中甲戌詔侍從官日一員輪直進

故事關治體者丁丑以韓世忠為檢校少師武城感德
軍節度使張俊檢校少保寧武昭慶軍節度使贈監察
御史常安民為左司諫江公望左諫議大夫錄其後二
人庚辰太后至自虔州薛慶及金人戰于揚州城下死
之郭仲威奔興化縣辛巳侍御史沈與求戶部侍郎李
陵以論宰相范宗尹皆黜宗尹復視事癸未盧益罷張
浚復永興軍再貶曲端海州團練使萬州安置甲申陳
萬信餘黨雷進作亂乙酉焚慈利石門二縣以御營司

叅議官王擇仁權河東制置使山砦首領韋忠佺為都
統制宋用臣馮賽同都統制丙戌命李成吳翊捍禦上
流翊棄城去以成為四州鎮撫使命李捧便道過信州
招捕靳賽戊子以饒信妖賊平赦二州徒以下囚蠲民
今年役錢貶滕康永州劉珏衡州並居住己丑詔岳飛
救楚州仍命劉光世遣兵往援辛卯杜湛渡江討羣賊
復石首等五縣壬辰盜入梅州殺守臣沈同之大掠而
去癸巳命福建安撫使程邁會兵討范汝為甲午知虢

州邵興遣統制閻興及金人戰于解州東屢破之金人陷承州命陳思恭屯兵明州以防海道劉光世遣王德勳瓊以輕兵渡江乙未遇金游騎于召伯埭敗之戊戌以桑仲為襄陽鄧隨郢州鎮撫使是月罷提舉廣西峒丁孔彥舟入潭州宣撫司參議官王以寧率兵拒之以寧敗遁去宣撫司主管機宜文字傅雱在彥舟軍中承制以彥舟權湖南副總管劉綱以乏食率兵奔溧陽九月辛丑呂頤浩入見請益兵命王玠巨師古顏孝恭兵

隸之分屯境內壬寅詔諸路決囚甲辰徽宗皇后鄭氏崩于五國城戊申命秦鳳將關師古領兵赴行在劉豫僭位于北京庚戌禁宣撫司僚屬便宜行事及京西湖南北路勿隸川陝宣撫司節制癸丑涇原同統制李彥琦及金人戰于洛河車渡敗之乙卯罷中書門下省檢正官桑仲陷均房州進犯白土關丙辰復增左右司郎官為四員金人攻楚州趙立死之丁巳趙霖復和州李成遣馬進犯興國軍戊午荆襄賊趙延壽犯德安府陳

規拒却之己未金均房安撫使王彥及桑仲戰于平麗
縣敗之王闢詣彥降辛酉李捧擊范汝為于建州官軍
皆潰捧遁去金人犯揚州統制靳賽逆戰于港河敗之
金人陷延安府執呂世存又陷保安軍癸亥張浚遣都
統制劉錫統五路兵及金將婁宿戰于富平縣浚駐郿
州督戰官軍敗績丙寅給劉光世犒軍銀二萬兩絹二
萬匹戊辰趙延壽焚郿州金人陷楚州鎮撫使李彥先
求救兵敗死之冬十月庚午朔張浚斬環慶經略使趙

哲于邠州貶劉錫合州安置命諸將各領兵歸本路浚
退保秦州陝西大震辛未秦檜自楚州金將槪懶軍中
歸于漣水軍丁襪水砦壬申命楊惟忠王玘討李成丙
子以孔彥舟為鼎澧辰沅靖州鎮撫使戊寅鍾相餘黨
楊華舉兵圍桃源縣己卯馬進犯江州癸未程昌寓入
鼎州擊楊華破之甲申趣劉光世救楚州丁亥以李回
同知樞密院事庚寅遣前御史臺檢法官謝嚮招范汝
為召張浚以兵入援追復李邦彥觀文殿大學士辛卯

虔州賊李敦仁及弟世雄舉兵破虔州石城縣甲午命楊惟忠率兵屯江州乙未岳飛破金人于承州丙申詔劉光世節制諸鎮守禦通泰州伺便襲金人過淮是月馮長寧棄城去尋以淮寧附劉豫江東賊張琪犯建康府劉洪道招降之環慶路統制慕洧叛附于夏國涇原統制張中彥經畧司幹辦趙彬叛降金人劉忠據岳州平江縣白面山王善餘黨祝友擁衆為亂屯滁州龔家城十一月癸卯慕洧遂引金人圍環州呂頤浩復南康

軍甲辰趙鼎罷乙巳秦檜入見丙午岳飛棄泰州渡江
丁未金人犯泰州飛退保江陰軍沙上以御史中丞富
直柔簽書樞密院事秦檜為禮部尚書李允文殺岳州
守臣袁植呂頤浩會楊惟忠與馬進戰南康軍不利戊
申頤浩遣巨師古救江州為進所敗師古奔洪州金人
陷涇原經略使劉錡退屯瓦亭己酉以孔彥舟為湖南
副總管部兵屯潭州庚戌命神武副軍都統制辛企宗
討范汝為壬子日南至率百官遙拜二帝乙卯改樞密

院幹辦官為計議官丙辰金人陷泰州丁巳通州守臣
呂伸棄城去王彥攻桑仲于黃水破之房州平張浚以
彥為金均房州鎮撫使崔增犯池州劉洪道遣統制李
貴擊走之增以兵萬餘詣呂頤浩降甲子詔諸路守臣
節制管內軍馬丙寅金房州賊郭希犯歸州田祐恭擊
卻之命王瓊部兵萬人速援呂頤浩祝友渡江大掠是
月張浚退軍興州秦鳳副總管吳玠收餘兵保大散關
東和尚原詔諸路轉運司括借寺觀田租蘆場三年十

二月庚午安南請入貢卻之辛未遣度支員外郎韓球
括饒信諸州錢糧凡江湖川廣上供皆拘之壬申命孔
彥舟援江州丙子禁節制軍馬守臣便宜行事丁丑馬
進分兵犯洪州乙丑李敦仁犯撫州崇仁縣命李山張
中彥討之壬辰金人犯熙州總管劉惟輔戰敗之殺五
千餘人甲午再犯熙州惟輔軍潰被執死之乙未以張
俊為江南招討使討李成丁酉范汝為降詔補民兵統
領是月張俊承制復海州團練副使曲端左武大夫興

州居住是歲宣撫處置司始令四川民歲輸激賞絹三十萬匹有奇

紹興元年春正月己亥朔帝在越州帥百官遥拜二帝不受朝賀下詔改元釋流以下囚復賢良方正直言極諫科蠲兩浙夏稅和買紬絹絲綿減閩中上供銀三分之一戊申改命張俊為江淮路招討使復江池路為江東西路分荆湖江南諸州為荆湖東西路置安撫司治池江鄂鼎州江南東西路各置轉運司荆湖東西路轉

運司通掌兩路財賦以呂頤浩為江東路安撫大使朱勝非江西路安撫大使馬進陷江州守臣姚舜明棄城走端明殿學士王易簡等二百人皆遇害己酉岳飛引兵之洪州金人犯揚州謝嚮率范汝為討平建陽賊劉時舉金人犯秦州吳玠擊敗之庚戌又犯西寧州守臣俱重迎降辛亥謝克家罷壬子詔京官知縣並堂除外侍從各舉可任縣令者二人犯贓連坐自今不歷縣令者勿除監司郎官不歷外任者勿除侍從著為令張

中孚以原州叛降于金癸丑李敦仁圍建昌軍蔡延世率鄉兵擊退之賊曹成入漢陽軍李允文招之成入鄂州復趨江西丁巳呂頤浩遣王瓊崔增擊賊于湖口大敗之頤浩及楊惟忠引兵趨江州辛酉詔太祖創業垂統德被萬世神宗詔封子孫一人為安定郡王世世勿絕自宣和末至今未舉有司其上應襲封人名依故事舉行金人再圍環州是月張浚復曲端榮州刺史提舉江州大平觀閬州居住尋移恭州二月戊辰朔宜章縣

民李冬至二作亂犯英連韶彬諸州祝友降劉光世分
其軍以友知楚州庚午改行宮禁衛所為行在皇城司
李成黨邵友犯筠州守臣王庭秀棄城去辛未犯臨江
軍守臣康倬遁壬申初定歲祀天地社稷如奏告之禮
癸酉桑仲自棗陽引兵還襄陽丁丑鄜延將李永琦叛
犯慶陽府戊寅禁州邵統兵官擅招安亂軍盜賊已卯
日中有黑子四日乃浚以辛企宗為福建制置使辛巳
以秦檜參知政事壬午水賊張榮入通州癸未詔辛企

宗及謝嚮罷遣范汝為兵汝為不聽命甲申詔王瓊張俊掎角討捕馬進等賊丙戌復置秘書省己丑命孔彥舟呂頤浩張俊會兵討李成壬辰雨雹癸巳邵青寇宣州丙申詔諸路提刑司以八月類省試張浚亦以便宜合川陝舉人即置司類省試丁酉宣教郎范壽坐誣訟孟忠厚且及太后除名潮州編管是月李敦仁犯汀州馬友遣其黨犯鄂州總管張用拒邵之李允文以友權湖南招捉公事友大掠漢陽而去過岳州守臣吳錫道

友據之三月戊戌朔以嚴衢二州守臣柳約李處勸有
治効各進職一等呂頤浩遣崔增王璣合兵擊李成于
湖口大敗之庚子張浚以富平之敗上疏待罪詔免壬
寅禁諸路遏糴丙午張俊楊沂中岳飛渡江擊馬進大
敗之孔彥舟焚掠潭州趨衡州己酉李成犯饒州庚戌
張俊楊沂中復擊馬進于筠河敗之復筠州進奔江州
男子崔紹祖詐稱越王中子受上皇詔為天下兵馬大
元帥趙霖以聞辛亥詔赴行在命劉光世兼淮南京東

路宣撫使治揚州經畫屯田光世迄不行甲寅罷諸州
免行錢乙卯金人破階州庚申劉超犯澧州統制杜湛
率兵拒之甲子始下詔罪李成募人禽斬赦脅從者張
俊追馬進至江州進戰敗遁去乙丑進復江州楊沂中
趙密引兵追擊進又大敗之成奔蘄州振淮南京東西
流民荆湖東路安撫使向子諲說降馬友與共討李冬
至二平之是月金人攻張榮縮頭湖水砦榮擊敗之來
告捷劉光世以榮知泰州金人迫興州張浚退保閬州

以端明殿學士張深為四川制置使及參議軍事劉子羽趨益昌參謀官王庶為龍圖閣待制知興元府兼利夔兩路制置使節制陝西諸路桑仲以其黨李道知隨州夏四月己巳張浚承制分利閬劔文政五州為利州路置經略安撫使庚午張琪復叛犯當塗縣金將撻懶渡淮屯宿遷縣樂馬湖壬申太白晝見乙亥劉光世復楚州階州統領杜肇復階州馬友引兵入潭州戊寅杜琪棄澧州劉超入據之己卯金涇原帥趙彬犯耀州守

臣趙澄擊走之淮賊寇宏犯濠州庚辰隆祐皇太后崩
癸未桑仲陷鄧州守將譚克棄城走河東招捉使王俊
引兵來援仲執斬之以其黨李橫知州事乙酉為太后
制朞年服辛卯羣臣三上表始聽政癸巳命向子諲發
兵及廣西安撫許中同扼險要防孔彥舟入廣仍許脅
從自新以招諭之是月京西賊李忠陷商州守臣楊伯
孫棄城走呂頤浩遣統制閻舉通判建昌軍蔡延世襲
擊李敦仁禽其弟世雄世臣五月丙辰朔蠲江西路被

賊州縣賦稅丁酉詔呂頤浩朱勝非劉光世並兼淮南
諸州宣撫使始奪李成官戊戌以張用為舒蘄鎮撫使
癸卯作大宋中興寶成金人犯和尚原吳玠擊敗之丙
午初復召試館職之制劉光世遣統制王德襲揚州執
郭仲威以獻伏誅辛亥水軍統制邵青叛圍太平州趙
彬及金人合兵圍慶陽府守臣楊可昇擊敗之甲寅命
知南外宗正事令應選年幼宗子將育于宮中詔收者
戶長役錢已未詔州縣因軍期徵取民財物者立式榜

示禁過數催擾庚申孔彥舟引衆過潭州馬友迎擊大敗之彥舟趨岳州犯鄂州李允文以彥舟為湖東副總管屯漢陽辛酉以直秘閣宗綱為荆南鎮撫使措置營田官樊賓為副壬戌劉光世招降邵青趙延壽據分寧縣呂頤浩招降之是月張俊及李成戰于黃梅縣殺馬進成敗遁歸劉豫李忠譚克各率兵歸張浚浚命王庶分其兵張用復叛寇江西岳飛招降之湖州進士吳木上書論宰執送徽州編管六月己巳始鬻承直修武郎

以下官壬申冊諡皇太后曰昭慈獻烈甲戌張琪犯餘
杭州又犯宣州乙亥月犯心庚辰湖賊楊華楊廣犯鼎
州程昌寓拒邵之上虞縣丞婁寅亮上書請選立繼嗣
壬午權檟昭慈獻烈皇后于越州張琪犯徽州守臣郭
東唐城去琪入據之癸未張浚引大兵至瑞昌縣之丁
家洲李允文自鄂部兵歸浚浚并其兵護允文赴行在
邵青率舟師至鎮江甲申復叛去丁亥崇安民廖公昭
合范汝為餘黨熊志寧作亂衆既散志寧復與建陽民

丁朝佐合兵陷二縣戊子慮囚己丑邵青犯江陰軍之
福山遣海州鎮撫使李進彥中軍統制耿進率舟師會
劉光世討之南安賊吳忠宋破壇劉洞天作亂庚寅江
西提刑司遣官討之破壇洞天皆伏誅忠遁去癸巳熙
河統制關師古洮東安撫郭玠同討熙州叛兵連敗之
甲午廣賊鄧慶龔富圍南雄州守臣鄭成之率兵民以
拒闕建劔汀州邵武軍租是月知虢州邵興屯盧氏縣
為河南統制董先所破走興元先遂取商虢二州張浚

承制以吳玠為陝西諸路都統制時關隴六路盡陷止
餘階成岷鳳洮五郡鳳翔之和尚原隴州之方山原黏
罕既得陝西地悉與偽齊秋七月乙未朔以馬友權荆
湖東路副總管趣討孔彥舟統制潘達後軍將胡江等
叛破玉山弋陽永豐三縣遣樞密院準備將領徐文討
之戊戌吳錫復入邵州庚子以岳飛為神武右副軍統
制留軍洪州彈壓盜賊辛丑封伯右武衛大將軍令話
為安定郡王壬寅虔州賊陳顥作亂命趣捕之甲辰詔

秘書省長貳通修日歷丙午劉光世遣將喬仲福擊邵
青于常熟為所敗撻懶自宿遷北歸戊申韓世清追襲
張琪復祈門縣庚戌張俊執傅雱赴行在張浚以曲端
屬吏以武臣康隨提點夔路刑獄與王庶雜治之辛酉
召呂頤浩赴行在張琪犯饒州頤浩遣閻舉擊敗之琪
黨姚興降琪走徽州癸亥范宗尹罷是月珍州守臣李
玠棄城去王彥數擊敗李忠趙彬來歸張浚承制以彬
為陝西轉運使又以涇原兵馬都監李彥琪為本路副

總管彥琪尋叛去八月丙寅以孔彥舟為蘄黃鎮撫使
丁卯以知潭州吳敏為荊湖東西廣南路宣撫使張浚
殺曲端于恭州獄張用部兵至瑞昌歸張浚浚以用為
本軍統制戊辰張守等上紹興重修勅令格式癸酉復
以汪伯彥為江東安撫大使乙亥呂頤浩遣將李鑄復
舒州丁丑祔昭慈獻烈皇后神主于溫州太廟戊寅張
守罷以李回參知政事富直柔同知樞密院事庚辰杜
湛及劉超戰于彭山為所敗辛巳超及楊華楊廣合兵

復寇鼎州程昌寓遣湛率舟師擊敗之遣辛企宗移軍
福州討熊志寧胡江等諸賊韓世清及張琪戰世清敗
琪復入祈門縣壬午命張俊遣兵捕之鑄紹興錢癸未
詔許邵青張琪脅從徒黨自新乙酉以李成在順昌恐
復謀亂遣使齎蠟書諭淮寧蔡州將士立賞格募人禽
斬成丁亥以秦檜為尚書右僕射同中書門下平章事
兼知樞密院事庚寅復李綱資政殿大學士募人往京
東河南伺察金齊動止仍齎詔慰撫忠義保聚之人蔡

州鎮撫使范福棄城去以土豪李祐代之辛卯蠲徽州
被賊民家夏稅壬辰置三省樞密院賞功房是月知鄂
州曹成掠湖西犯沅州與知復州李宏合屯瀏陽既而
攻宏宏奔潭州九月甲午朔張琪黨李捧犯宣州守臣
李彥卿及韓世清擊却之詔江東西路安撫使復治建
康府洪州以王玘知池州楊惟忠知江州並兼管內安
撫使率部兵赴官丙申斬李世臣己亥以資政殿學士
葉夢得為江南東路安撫大使兼壽春等六州宣撫使

庚子張琪復陷宣州己乃遁去辛丑命王瓊討琪丁未
詔歲再遣使省謁諸陵因撫問河南將士命馬友移屯
鄂州庚戌命宗室右監門衛大將軍士芑朝饗溫州太
廟辛亥合祭天地于明堂太祖太宗並配大赦罷諸州
守臣節制軍馬錄用元符末上書人子孫癸丑復以呂
頤浩為尚書左僕射同中書門下平章事兼知樞密院
事丁巳王彥破李忠於秦郊店忠奔歸劉豫戊午禁福
建轉運司抑民出助軍錢落范宗尹觀文殿學士己未

初措置河南諸鎮屯田以戶部尚書孟庾為江東西湖
東等路宣諭制置使辛酉詔四方有建策能還兩宮者
實封以聞有効者賞以王爵壬戌遣御史胡世將督捕
福建盜賊是月長星見冬十月乙丑詔蔡京王黼門人
實有才能者公舉叙擢李回罷丙寅朱勝非分司江州
居住丁卯以李允文恣睢專殺賜死大理獄己巳王德
招邵青降之庚午以孟庾參知政事徽猷閣直學士湯
東野為江淮發運使劉洪道招降李捧董旺壬申置行

在大宗正司癸酉兀朮攻和尚原吳玠及弟璘力戰大敗之兀朮僅以身免丁丑增置諸路武尉戊寅以張俊為太尉移屯婺州壬午初置見錢關子招人入中以給軍食范汝為復叛入建州守臣王浚明棄城走辛企宗退屯福州甲申劉超請降以超守光州戊子崔紹祖伏誅詔邵青以舟師赴行在己丑升越州為紹興府李成軍正李雱伏誅知承州王林禽張琪于楚州檻送行在壬辰錄程頤孫易為分寧令癸巳范汝為犯邵武軍守


臣吳必明統制李山率兵拒之衆潰退保光澤縣關師古復秦州獲郭振是月劉豫遣將王世冲寇廬州守臣王亨大破之斬世冲曹成及馬友戰于潭州成敗還攸縣王才遣將丁順圍濠州劉光世遣兵攻橫澗山順解圍去十一月乙未葉夢得至建康以詔招王才降之丙申遣內侍撫問孔彥舟桑仲丁酉榜諭福建江東羣盜赦其脅從者戊戌詔移蹕臨安以孟庾為福建江西荆湖宣撫使神武左軍都統制韓世忠副之仍命械謝嚮

陸棠赴行在己亥以婁寅亮為監察御史范汝為犯光澤縣李山走信州辛丑續編紹興太常因革禮桑仲請正劉豫惡逆之罪詔進幸荆南乙巳以右司諫韓璜黨富直柔責監潯州稅張琪伏誅庚戌富直柔罷荆湖廣西宣撫使吳敏始受命置司柳州辛亥升康州為德慶府壬子詔內外侍從各舉所知三人丙辰程昌寓遣杜湛擊楊華敗之命張浚遣使持詔招曹成以所部赴行在己未楊華請降辛酉命吏部侍郎李光節制臨安府

內外諸軍壬戌曹成犯安仁縣執安撫使向子諲進攻道州是月前知鄜州李惟德以岷州來歸吳玠始遣人通書夏國十二月乙丑吳敏罷丙寅復置樞密院都承旨范汝為遣葉澈寇南劍州守臣張翬拒戰大破之己巳遣吏部侍郎傅崧卿為淮東宣諭使甲戌遣江東安撫司統制郝晟顏孝恭討建昌軍賊乙亥辛企宗罷仍追三官率兵赴軍前自效丁丑蠲諸路在官積欠詔官戶名田過制者與民均科以岳飛為神武副軍都統制

部兵屯洪州曹成陷道州守臣向子忭棄城走戊寅以
彗出求直言增行在職事官職錢遣駕部員外郎李愿
撫諭川陝已卯詔兩浙分東西路置提點刑獄庚辰桑
仲遣兵寇復州守臣俎適棄城去辛巳復置廣西提舉
茶鹽司知海州薛安靖殺偽都巡檢使王企中率軍民
以城來歸增諸路酒錢以備軍費甲申知龍州范綜統
制雷仲舉兵復水洛城已丑起復陝西都統制吳玠為
鎮西軍節度使詔江西安撫司趣兵討捕吳忠是月劉

豫遣將王彥充攻壽春府桑仲遣李橫復寇金州王彥
拒戰于馬郎嶺大破之均州平蔡州褒信縣弓手許約
叛據光州階州安撫孫注復洮州龔富等圍南劔州



宋史卷二十六

欽定四庫全書

史部

宋史卷

二十七至三十

詳校官編修臣邱庭澹

洗馬臣王坦修覆勘

覆校官編修臣沈清藻

校對官監丞臣張曾炳

謄錄舉人臣楚惟崇

欽定四庫全書

宋史卷二十七

元中書右丞相總裁托克托等修

本紀第二十七

高宗四

二年春正月癸巳朔帝在紹興府率百官遙拜二帝不
受朝賀甲午詔復置賢良方正直言極諫科丙申賜楊
邦乂謚曰忠襄韓世忠圍建州丁酉蠲諸路元年逋稅

庚子陝西叛將白常圍岷州關師古率兵破之辛丑韓世忠拔建州范汝為自焚死斬其二弟餘黨悉平壬寅帝發紹興曹成釋向子諲丙午帝至臨安府壬子遣韓世清捕石陂賊癸丑以張俊檢校少保定國軍節度使劉豫遣兵犯伊陽縣翟興及其將李恭合擊敗之曹成犯郴州永興縣己未修臨安城辛酉遣內侍任源撫問張浚江西副總管楊惟忠以楊勅雖就招安復謀作亂誘誅之二月甲子楊華復叛擾鼎澧潭三州詔立賞禽

捕首領赦貸脅從丙寅命劉光世將銳卒萬人屯揚州
經理淮東唐午以李綱為觀文殿學士湖廣宣撫使仍
命岳飛率馬友李宏韓京吳錫等共討曹成諸盜甲戌
以吏部尚書李光為淮西招撫使王玠副之乙亥雨雹
丙子以施逵謝嚮陸崇黨范汝為逵除名婺州編管嚮
崇械赴行在俱道死丁丑分崔增李捧邵青趙延壽李
振單德忠徐文所部兵為七將名御前忠銳軍隸步軍
司非樞密奉旨不許調遣減淮南營田歲租三之二俟

三年復舊已卯劉光世入見同執政對內殿諭以進屯
楊州光世迄不行庚辰詔監司避本貫壬午程昌寓遣
杜湛募兵攻賊周倫破之甲申以工部員外郎滕茂實
死節于代州贈龍圖閣直學士丙戌初置著作官二員
修日歷己丑復荆湖東西為荆湖南北路南路治潭北
路仍治鄂申禁福建路私有私造兵器是月知商州董
先叛入劉豫金人陷慶陽府執楊可升降之三月壬辰
朔命襄鄧鎮撫使桑仲收復陷沒諸郡仍命諸鎮撫使

互相應援再貶徐秉哲惠州吳玠南雄州莫儔韶州並
居住水賊翟進襲漢陽軍殺守臣趙令幾李光執韓世
清于宣州以歸虔化縣賊李敦仁及其徒皆授官隸諸
軍乙未復置江陰軍罷福建路武尉戊戌葉夢得罷以
李光為江東安撫大使兼滁濠等六州宣撫使罷江淮
發運司桑仲如郢州調兵守將霍明以仲將謀逆殺之
以其事聞庚子金人攻方山原陝西統制楊政援之金
兵引去辛丑又犯隴安縣吳璘等擊走之淮南營田副

使王實括閒田三萬頃給六軍耕種丙午復置中書門
下省檢正官省樞密院檢詳官己酉以神武右軍中部
統制楊沂中為神武中軍統制癸丑河南鎮撫使翟興
為部將楊偉所殺甲寅金人復自水洛城來攻楊政等
又敗之庚申曹成寇賀州清水砦守臣劉全棄城去是
月知壽春府陳卞及鈐轄陳寶等舉兵復順昌府導引
兵歸為偽齊所逐并壽春失之夏四月甲子曹成陷賀
州陳顥圍循州焚龍川縣命江西安撫司遣將捕之丙

寅賜禮部進士張九成以下二百五十九人及第出身
庚午以翰林學士承旨翟汝文參知政事壬申釋福建
諸州雜犯死罪以下囚江西軍賊趙進寇瑞昌縣楊惟
忠討降之戊寅偽齊統領王資率兵來歸富順監男子
李勃偽稱徐王召赴行在壬午詔內外侍從監司守臣
各舉中原流寓士大夫三二人以備任使癸未詔曰朕
登庸二相倚遇惟均其所薦用之人不得偏私離間朋
比害政謚孫傳曰忠定乙酉李綱始拜命置司福州是

夜太平州軍士陸德據城叛囚守臣張鐸殺當塗縣令
鍾大猷戊子命呂頤浩都督江淮荆浙諸軍事庚寅劉
豫徙居汴京是月王彥大破董先于馬嶺闕復商州閏
月癸巳高麗遣使入貢乙未知池州王進討陸德誅之
丙申岳飛擊破曹成于賀州置都督府隨軍轉運司丁
酉左朝奉郎孫覲坐前知臨安府贓污貸死除名象州
羈管罷後苑工作辛丑韓世清以狂悖伏誅丙午岳飛
敗曹成于桂嶺縣成走連州遣統制張憲追擊破之又

走郴州入邵州丁未賜福建宣撫司賞軍錢十萬緡聽
朱勝非自便乙卯詔諸鎮撫使非奉朝旨毋擅出兵劉
光世聞父喪去官特命起復己未詔自今明堂專祀昊
天上帝以太宗配是月張浚命利夔制置使王庶與知
成都府王似兩易其職襄鄧副都統制李橫同副都統
制李道合兵圍郢州霍明遁去五月辛酉以兵部尚書
權邦彥簽書樞密院事以樞密將領趙琦所部兵為忠
銳第八將癸亥呂頤浩出師以神武後軍及忠銳兩將

從行百官班送甲子以霍明權襄鄧隨郢州鎮撫使詔
觀察使已上各薦可備將帥者二人丁卯罷兩浙轉運
司回易庫已巳廢紹興府餘姚上虞縣湖田為湖溉民
田庚午詔修建康行宮辛未選宗室子偁之子伯琮育
于禁中丙子呂頤浩總師至常州前軍將趙延壽兵叛
于呂城鎮丁丑延壽犯金壇縣殺知縣胡思忠頤浩稱
疾不進戊寅海州賊王山犯漣水軍總領蘓復副統制
劉靖會兵擊敗之庚辰臨安府火癸未置御前軍器所

甲申親慮囚自是歲如之罷行在權官乙酉劉光世遣王德追趙延壽叛兵至建平縣悉誅之丙戌置脩政局命秦檜提舉詔侍從臺省寺監官監司守令條具省費裕國彊兵息民之策丁亥以中書門下省檢正官仇愈為沿海制置使戊子手詔用建隆故事命百官日輪一人轉對兩浙轉運副使徐康國獻銷金屏障詔有司毀之奪康國二官蠲太平州被賊之家夏稅是月張浚以參贊軍事劉子羽知興元府黜王庶復以王似知成都

府韓世忠至洪州遣董敗招曹成成聽命赴行在六月
庚寅朔李宏引兵入潭州執馬友殺之甲午李綱領兵
三千發福州戊戌詔孟庾韓世忠班師岳飛屯駐江州
庚子以劉光世為寧武寧國軍節度使韓世忠為太尉
移屯建康府辛丑以李橫為襄郢鎮撫使李道鄧隨鎮
撫使壬寅翟汝文罷孔彥舟叛降偽齊乙巳以權邦彥
兼權參知政事戊申仇愈兼制置福建路辛亥免臺諫
官輪對甲寅召呂頤浩赴行在令參謀官傅崧卿權主

管都督府事詔兩浙江淮守臣令存撫東北流寓人乙
卯韓世忠遣統制解元巨振入潭州執李宏以歸秋七
月辛酉悉蠲福建諸州被兵之家田稅壬戌復置湖北
提舉茶鹽司甲子罷福建提舉市舶司己巳起復翟琮
為河南府孟汝唐州鎮撫使甲戌罷淮東路提點刑獄
司丙子馬友黨郝通率兵五萬歸宣撫司戊寅知廬州
王亨復安豐壽春縣己卯呂頤浩入見庚辰韓世忠討
劉忠駐兵于岳州之長樂渡大破之忠走淮西丁亥詔

編次建炎以來譜牒八月壬辰以孟庾兼權同都督江
淮荆浙諸軍事癸未順昌縣賊余勝等作亂通判南劍
州王元鼎捕殺之甲午安定郡王令話薨丙申詔郡守
除罷赴闕皆得引對臨安府火以知江州劉紹先為沿
淮防遏使戊戌命朱勝非提舉醴泉觀兼侍讀日赴朝
堂議事沿海州縣籍民海舶每歲一更守海道險要振
福建饑民己亥停傳雱官英州羈管庚子詔孟庾韓世
忠總大兵至建康進赴行在戊申給事中胡安國以論

朱勝非罷宰執臺諫上疏留之皆不報江西統制傅樞
討平南雄賊張忠鄧慶劉軍一等已酉賜吳玠田甲寅
秦檜罷給事中程瑀等坐論駁朱勝非疑其黨檜並落
職主宮觀彗出胃乙卯減膳戒輔臣脩闕政罷脩建康
行宮九月戊午朔落秦檜職已未罷修政局辛酉以彗
出大赦許中外臣民直言時政陝西諸叛將許令自新
壬戌王倫自金國使還入見遣潘致堯等為金國軍前
通問使附茶藥金幣進兩宮甲子以直徽猷閣郭偉為

淮西巡撫使乙丑復以朱勝非為尚書右僕射同中書
門下平章事兼知樞密院事戊辰司空山賊李通出降
以為都督府親軍統領癸酉以右朝請大夫呂源為浙
東福建沿海制置使治定海縣知建昌軍朱芾擊石陂
賊余照禽斬之甲戌彗沒丙子復以郭仲荀為武泰軍
節度使詔墨勅有不當者許三省樞密院奏稟給事中
中書舍人繳駁臺諫論列有司申審庚辰命福建提舉
茶鹽官兼領市舶司辛巳以韓世忠為江南東西路宣

撫使他帥臣稱宣撫使者並罷壬午遣監察御史明橐
等五人宣諭江浙湖廣福建諸路仍降詔諭官吏以遣
使按察勸懲誅賞之意癸未新作行宮南門成甲申提
轄權貨務張純浚立淮浙鹽法增其算總領四川財賦
趙開初變四川鹽法盡權之乙酉太白晝見丙戌以知
興元府王似為川陝宣撫處置副使丁亥封右監門衛
大將軍榮州防禦使令時為安定郡王是月韓世忠遣
統制解元襲擊劉忠干斬陽大破之忠奔劉豫冬十月

戊子朔置牧馬監于饒州庚寅李勃伏誅丙申初置江浙荆湖廣南福建路都轉運使甲辰潘致堯至楚州通判州事劉晏劫其禮幣奔劉豫守臣柴春戰死戊申以知平江府趙鼎為江東安撫大使丙辰禁溫台二州民結集社會班度量權衡于諸路禁私造者是月顏孝恭招降石陂餘賊李寶等十一月辛酉陳顥陷汀州武平縣犯梅循二州乙丑初權明州鹵田鹽卒未議將撫師江上召侍從官條具利害甲戌命李綱劉洪道程昌寓

解潛會兵捕討湖寇楊太戊寅范汝為餘黨范忠掠龍泉縣庚辰詔宣諭五使焚所至州縣建炎以前已蠲稅籍癸未臨安大火是月闕師古敗偽齊兵于抹邦山馬友黨步諒詣李綱降綱入潭州其黨郝晷降王進吳錫禽王浚湖南盜賊悉平十二月丁亥朔命神武前軍統領申世景等討捕范忠已丑偽稱榮德帝姬易氏伏誅范忠犯處州巨師古引兵入廬州執王亨送行在甲午李綱罷臨安府火丙申振被火家罷浙東沿海制置司

丁酉岳飛遣統領徐慶王貴討禽萍鄉賊高聚己亥以胡舜陟為廬壽等州鎮撫使金人侵熙秦關師古擊敗之庚子遣駕部員外郎李愿撫諭川陝江西兵馬副鈴轄張中彥坐縱暴不法斬于潭州辛丑程昌寓遣杜湛討楊欽等敗之殺三千餘人癸卯川陝宣撫司類試陝西發解進士得周謨等十三人以便宜賜進士出身甲辰罷張浚宣撫處置使仍知樞密院以知夔州盧法原為川陝宣撫處置副使及王似同治司事己酉遣司封

貲外郎周隨亨同撫諭川陝庾戍孟庾自建康來朝辛
亥金人犯商州守將邵隆退屯上津李橫敗偽齊兵復
汝州甲寅命孟庾同都督江淮荆浙諸軍事詔都督府
總治江東西湖北浙西帥臣經畫屯田張浚承制以歸
州隸夔州路是冬金人犯和尚原將士乏食自潰吳玠
拔砦棄去虔賊謝達犯惠州

三年春正月丁巳朔帝在臨安率百官遙拜二帝不受
朝賀江西將李宗諒誘戍兵叛寇筠州統領趙進擊卻

之翟琮入西京禽偽齊留守孟邦雄命諸路憲臣兼提
舉常平司庚申金人犯上津李橫破潁順軍偽齊知軍
蘭和降壬戌金人犯金州洵陽縣以仇愈為福建兩浙
淮東路沿海制置使癸亥陳顥圍潮州不下引兵趨江
西甲子李橫復潁昌府乙丑詔中外刑官各務仁平臺
憲檢察月具所平反以聞歲終考察殿最金人陷金州
鎮撫使王彥楚積聚退保西鄉庚午罷行在宗正司命
嗣濮王仲湜兼判大宗正事辛未震雷雨電造渾天儀

李通為其徒王全所殺壬申命西外宗正移司福州癸酉復祭大火以湯東野為淮東安撫使乙亥以李橫為襄陽府鄧隨郢州鎮撫使丁丑登萊山砦統制范溫率部兵泛海來歸庚辰詔春秋望祭諸陵張浚論奏王似不可為副因引罪求罷不報癸未詔民復業者視墾田多寡定租額賦役乙酉減淮浙蠶鹽錢二月丁亥朔升桂州為靜江府己丑權邦彥薨浙東賊彭友犯龍泉縣辛卯李通餘黨劉德圍舒州吳玠遇金人于饒風闕王

彥自西鄉來會金人分兵攻闕統制郭仲敗走丁酉饒
風闕破玠趣西縣彥奔達州四川大震張浚被罷職之
命以諸軍方潰因秘不行復具奏審己亥金帥撒離曷
入興元府經畧使劉子羽焚其城走三泉縣吳玠退屯
仙人關庾子以宗子伯琮為和州防禦使賜名瑗尋改
貴州辛丑蠲廣東諸州被賊民家稅壬寅鄭州兵馬鈐
轄牛皋彭玘率兵與李橫會橫以便宜命皋為蔡唐州
鎮撫使玘知汝州乙巳翟琮遣統制李吉敗偽齊兵于

伊陽又殲其將梁進之衆丁未王似始受宣撫副使之命戊申虔賊周十隆犯循梅汀州詔統制趙祥等合兵捕之庚戌以李橫為神武左軍副統制京西招撫使改胡舜陟為淮西安撫使辛亥以工部尚書席益參知政事翰林學士徐俯簽書樞密院事壬子王全犯廬州甲寅詔守臣至官半年具上民間利害或邊防五事李橫遣人奏顏昌之捷詔許橫便宜行事乙卯劉光世遣鄺瓊等屯兵泗州為李橫聲援是月張浚復以王庶為參

謀官往巴州措置時金兵深入至金牛鎮疑有伏由褒
斜谷引兵還興元吳玠劉子羽追擊其後殺獲甚衆三
月己未詔岳飛捕虔賊壬戌申命統制巨師古部兵萬
人屯楊州胡舜陟至廬州壬子以趙鼎為江西
安撫大使李橫傳檄諸軍收復東京己巳金人遣兵援
劉豫李橫敗走穎昌復陷壬午以韓世忠為淮南東路
宣撫使李綱遣兵擊降李宗諒詔戮于市夏四月丁亥
朱勝非以母喪去位偽齊知號州董震及其統制董先

來歸以震權商號陝州鎮撫使己丑詔江東西湖北浙
西募民佃荒田蠲三年租辛卯以劉光世為檢校太傅
江南東路宣撫使金人去興元壬辰徙都督府于鎮江
岳飛軍次虔州甲午偽齊知唐州胡安中來歸丙申偽
齊李成攻陷號州董先牛皋犇襄陽己亥改諡昭慈獻
烈皇后為昭慈聖獻復舉五帝日月之祀庚子增文武
小官奉辛丑荆南統制羅廣率兵至鼎州楊太衆益盛
自號大聖天王立鍾相少子子義為太子廣等不克討

而還丁未岳飛遣統領張憲王貴擊彭友禽斬之劉忠
為部下王林所殺傳首行在戊申以浙西兵馬鈐轄史
康民所部兵為忠銳第九將己酉張浚奏王庶王似盧
法原威望素輕乞命劉子羽吳玠並為判官不報辛亥
徐文叛奔偽齊五月丙辰以翟琮為河南府孟汝鄭州
鎮撫使董先為副使丁巳遣樞密計議官任直清撫諭
襄陽商號河南諸鎮己未命楊沂中招捕嚴州盜賊辛
酉建睦親宅以董先為商號陝州鎮撫使徵河南布衣

王忠民為宣教郎至行在辭不受壬戌潘致堯還言金人欲重臣通使以取信遂寢出師之議乙丑罷諸州在任守臣所辟通判丁卯以韓肖胄等充金國軍前通問使安化蠻犯邊廣西經畧使許中發兵擊之戊辰楊沂中招降嚴州賊繆羅等捕斬其徒百人魔賊平庚午以岳州數被兵免今年稅役壬申詔守令尉佐境內妖民聚集不能覺察致亂者並坐罪知建昌軍朱芾討南豐縣賊禽誅其魁黃琛乙亥以方與金國議和禁邊兵犯

齊境丙子王彥復金州金兵棄均房去韓世忠請以大軍還鎮江已卯詔淮南統制解元成泗州餘屯江北周隨亨李愿宣押王似盧法原至閬州張浚始解使事時已論金牛之功以吳玠為利州路階成鳳州制置使劉子羽為寶文閣直學士王彥為保大軍承宣使僚屬將帥第賞有差庚辰浚及子羽王庶劉錫等赴行在詔李橫等收軍還鎮辛巳罷宣撫司便宜黜陟六月甲申朔統制巨師古坐違韓世忠節制除名廣州編管丙戌復

置六部架閣庫丁亥禁諸路招納淮北人及中原軍來
歸者戊子復元祐宰相呂大防官職贈謚庶寅詔降川
陝死罪囚釋流以下賞吳玠關師古將士壬辰張浚至
綿州復奏王似不可任甲午命王瓌率諸軍討楊太已
亥罷沿海制置司丁未置國子監及博士弟子員戊申
以王林所部兵為忠銳第十將已酉岳飛自虔州班師
辛亥發兵屯駐虔廣二州彈壓盜賊州各三千人是月
金人圍方山原王似命吳玠發兵救之秋七月己未復

置博學宏詞科初許任子就試甲子以久旱償州縣和
市民物之直丁卯詔訪求累朝勲臣曹彬等三百人子
孫以備錄用戊辰王瓌以舟師發行在己巳詔減膳禁
屠弛工役罷苛撓命兩浙及諸路憲臣親按部錄囚辛
未蠲紹興二年和市絕帛癸酉呂頤浩等以旱乞罷政
帝賜詔曰與其去位曷若同寅協恭交修不逮思所以
克厭天心者頤浩等乃復視事乙亥朱勝非起復丙子
泉州水溢壞城丁丑遣中使逆趣張浚于道是月四川

霖雨地震八月己丑詔岳飛赴行在留精兵萬人戍江
州翟琮率兵突圍犇襄陽詔屯駐其地癸卯罷諸路輸
禁軍闕額錢甲辰以雨暘不時蘓湖地震求直言乙巳
復置史館修撰直館檢討官命郎官兼領著作郎及佐
郎戊申罷都轉運司己酉詔湖南丁米三分之二均取
于民田其一取之丁口辛亥孟庾自軍中來朝九月戊
午呂頤浩罷詔凡遇水旱災異監司郡守即具奏毋隱
庚申岳飛自江州來朝川陝統領官吳勝敗偽齊兵于

黃堆砦丙寅以趙鼎為江西安撫制置大使壬申詔中
書舍人給事中凡制勅非軍期機速必先書押而後報
行甲戌偽齊王彥先寇徐宿二州乙亥以劉光世為江
東淮西宣撫使置司池州韓世忠為鎮江建康府淮南
東路宣撫使置司鎮江府王瓌為荆南府岳鄂潭鼎澧
黃州漢陽軍制置使置司鄂州岳飛為江南西路舒蘄
州制置使置司江州主管殿前司郭仲荀知明州兼沿
海制置使神武中軍統制楊沂中兼權殿前司己卯吳

勝克蓮花城冬十月癸未朱勝非上重修吏部七司勅
令格式庚寅加吳玠檢校少保壬辰趣王瓌進兵詔寬
私鹽重法甲午邵大理國入貢丁酉殘破州縣視戶口
增損立守令考課法己亥禁州縣擅增置稅場偽齊李
成陷鄧州辛丑南丹蠻莫公晟圍觀州焚寶積監殺知
監陳烈壬寅偽齊兵逼襄陽李橫以糧盡棄城奔荆南
知隋州李道亦棄城去甲辰王瓌討湖賊戰于鼎口不
利偽齊陷郢州守臣李簡棄城去申禁私役戰士丁未

命三省除銓曹姦弊戊辰罷諸路類省試統制石世達
及杜湛合兵大破湖賊黃誠于龍陽洲庚戌復置宗正
少卿及寺監諸丞是月王彥先引兵至北壽春將渡淮
劉光世駐軍建康扼馬家渡又遣鄺瓊駐無為軍為廬
濠聲援賊乃還十一月己未以右文殿修撰王倫為都
督府參議官癸亥詔監司帥守察內外宗子病民害政
者以聞崔增吳全遇湖賊于陽武口死之甲子韓肖胄
等使還乙丑禁沿淮諸砦兵擅侵齊境庚午臨安府火

甲戌禁掠賣生口入蠻夷嶠峒及以銅錢出中國乙亥
復元祐十科舉士法丁丑命賔橫宜觀四州市戰馬戊
寅王瓌自鼎州引兵還鄂留統領王渥等四軍聽程昌
寓節制己卯蠲南劍州所負民間獻納錢十六萬緡省
淮南州縣文武官十二月辛巳朔降勅書撫諭吳玠及
川陝將士乙酉臨安府火戊子又火朱勝非以屢火求
罷不允丙申王似承制廢通遠軍己酉金國元帥府遣
李永壽王翊來見是歲海寇黎盛犯潮州焚民居毀城

去

四年春正月辛亥朔帝在臨安率百官遙拜二帝乙卯
增淮浙路鹽鈔貼納錢遣章誼等為金國通問使己未
程昌寓遣杜湛王渥攻楊太皮真砦破之己巳詔諭王
似盧法原吳玠使之協和金人犯宕昌臨江砦及花石
峽關師古遣統領劉戩分兵拒却之庚午詔諸路將帥
毋以兩國通使輒弛邊備淮南州郡津渡尤慎譏察甲
戌罷州縣新置弓手乙亥蠲循梅潮惠四州被兵家租

賦丙子申勅三省樞密院除官並遵舊制毋相侵紊除
拜罷免皆明示黜陟之由戊寅金人犯神垕沿北嶺
至大散關臨安府火已卯韓肖胄罷二月壬午詔賊罪
至死者仍籍其貲癸未作建康府行宮席益罷乙酉以
徐俯兼參知政事丙戌禁川陝諸將招納北軍湖北軍
賊檀成犯長陽縣解潛遣統領胡勉捕斬之羣盜田政
自襄陽犯陝州己丑解潛遣統制王恪擊政斬之庚寅
金人犯兩當縣乙未詔孟庾赴行在己亥詔三衙管軍

及將帥觀察使以上舉忠勇智略可自代者一人辛丑
金人犯仙人關癸卯詔權以射殿為景靈宮四時設位
朝獻丙午張浚入見三月辛亥朔吳玠率楊政吳玠田
晟王喜諸將與兀朮戰于仙人關大敗之兀朮遁去戊
午雨雹以趙鼎參知政事壬戌孟庾至行在罷都督府
以其兵屬張俊乙丑張浚以資政殿大學士罷尋落職
奉祠福州居住己巳蠲淮南州縣民租一年辛未日有
青赤黃氣編次建炎以來詔旨頒諸路癸酉蠲興元府

洋州被兵家稅役二年丙子以王似為資政殿學士川
陝宣撫使盧法原為端明殿學士與吳玠並充副使關
師古為熙河蘭廓路安撫制置使夏四月庚辰朔命趙
開再任總領四川財賦詔諭川陝官吏兵民以張浚失
措當示遠竄猶嘉其所用吳玠等能禦大敵許國一心
止從薄責仍令宣撫司請求諮訪凡擾民拂眾之事速
釐革之癸未劉子羽白州安置乙酉詔明堂用皇祐典
禮兼祀天皇帝神州地祇以下諸神丙戌吳玠敗金

兵復鳳秦隴州詔特旨處死情法不相當者許大理奏
審蠲淮南州軍上供錢一年庚寅置孳生牧馬監于臨
安府甲午罷廣西提舉茶鹽司闕師古叛以洮岷二州
降偽齊吳玠併將師古軍乙未詔諸路歲上戶口丁酉
罷諸州回易庫庚子命劉光世遣兵巡邊辛丑保靜州
夷人入貢丙午徐俯罷是月王似承制廢符陽軍知壽
春府羅興叛降偽齊五月庚戌朔以岳飛兼黃復二州
漢陽軍德安府制置使癸丑以范冲為宗正少卿兼直

史館重脩神宗哲宗正史實錄甲寅詔淮南帥臣兼營田使守令以下兼管營田岳飛復郢州斬偽齊守荆超甲子以孟庾兼權樞密院事乙丑賜李橫軍絹萬匹丙寅李成棄襄陽去岳飛復取之金人攻金州鎮撫使王彥遣統制許青等與戰于漢陰敗之罷諸縣武尉壬申裁省三省樞密細務責六曹長貳專決癸酉以國史日历所為史館偽齊收李成餘衆益兵駐新野岳飛與別將王萬夾擊復大敗之乙亥王彥數敗金兵于洵陽縣

丙子復選宗室子彥之子伯玖育于禁中六月壬申復命川陝類試乙未太白晝見經天戊戌詔神武軍神武副軍統制統領官並隸樞密院庚子以霖雨罷不急之役壬寅詔三省樞密院凡奉干請墨勅許執奏不行置史館校勘官作明堂行禮殿于教場甲辰禁諸軍彊刺平人為兵已刺者皆釋之吳玠乞宮觀不允是月熒惑犯南斗岳飛將牛輦復隨州執偽齊守王嵩礫之秋七月戊申朔曲赦虔州以吏部尚書胡從年簽書樞密院

事庚戌以湖南安撫席益為安撫制置大使建昌軍軍卒修達等作亂殺守臣劉滂江西制置使胡世將遣參謀侯懋統制兵贊討之壬子命吳玠通信夏國癸丑湖賊楊欽等破社木砦官軍敗卻小將許奎戰歿丙辰賞仙人關之功以吳玠為檢校少師奉寧保靜軍節度使吳璘楊政以下論賞有差丁巳命左右司歲考郎官功過治狀以為賞罰庚申復曲端趙哲官壬戌岳飛遣統制王貴張憲擊敗李成及金兵于鄧州之西復鄧州禽

其將高仲丙寅侯懋引兵入建昌軍執修達等十三人
斬之罷建州蠟茶綱詔江東安撫司招水軍千五百人
已巳湖賊萬餘人詣鼎澧二州降劉光世來朝庚午王
貴張憲破金齊兵復唐州及信陽軍襄漢悉平辛未章
誼孫近使還入見粘罕致書約淮南毋得屯兵八月庚
辰以趙鼎知樞密院事充川陝宣撫處置使湖賊夏誠
等犯枝江縣解潛遣將蔣定舟與戰敗之辛巳吳玠遣
統領姚仲攻隴城縣克之壬午王瓌以討賊無功降光

州觀察使戊子改命趙鼎都督川陝荆襄諸軍事乙未
遣魏良臣等充金國通問使丙申毀王安石舒王誥已
亥周十隆出降為官軍所掠復遁去犯汀循州壬寅王
似罷以岳飛為清遠軍節度使湖北荆襄潭州制置使
代王瓌討湖賊癸卯以襄陽府隨郢唐鄧州信陽軍六
郡為襄陽府路九月戊申減淮浙路鹽鈔所增貼納錢
壬子夏誠遣將李全功犯公安軍解潛遣統制林閏等
擊斬之安定郡王令時薨辛酉合祭天地于明堂大赦

蠲襄陽等六郡三年租稅庚午朱勝非罷金齊合兵自
淮陽分道來犯壬申渡淮楚州守臣樊叙棄城去韓世
忠自承州退保鎮江府癸酉以趙鼎為尚書右僕射同
中書門下平章事兼知樞密院事吏部尚書沈與求參
知政事冬十月丙子朔與趙鼎定策親征命張浚以軍
援淮東劉光世移軍建康車駕擇日進發丁丑以孟庾
為行宮留守留統制王進一軍及神武中軍五百人隸
之百司不豫軍旅之務者聽從便避兵己卯韓世忠自

鎮江率兵復如揚州金人犯滁州以張浚為浙西江東
宣撫使金人圍亳州席益遣統制吳錫率兵討徭賊楊
再興大破之壬午偽齊兵犯安豐縣癸未復以張浚為
資政殿學士提舉萬壽觀兼侍讀甲申復以王瓌為建
武軍承宣使江西沿江制置使丙戌命胡松年詣江上
會諸將議進兵戊子韓世忠邀擊金人于大儀鎮敗之
又遣將董旼敗之于天長縣鴉口橋己丑金人攻承州
韓世忠遣將成閔解元合兵擊于北門敗之金人圍濠

州甲午遣秘書正字楊晨持詔撫諭四川遣侍御史魏
玘監察御史田如鼇詣劉光世張浚軍中計事光世始
移軍太平州丙申命後宮自溫州泛海如泉州金人陷
濠州守臣寇宏棄城走丁酉詔州縣團教弓手土兵戊
戌帝御舟發臨安劉錫楊沂中以禁兵扈從己亥韓世
忠捷奏至命收瘞戰死將士仍令胡松年致祭庚子張
浚率兵發鎮江如建康壬寅帝次平江加贈陳東歐陽
澈秘閣修撰官其子孫二人各賜田一頃且追咎汪伯

彥落觀文殿學士黃潛善更不追復命韓世忠楊沂中
分兵控扼沿海要地癸卯焚決淮東閘堰賜扈從諸軍
錢乙巳仇愈遣將孫暉擊金人于壽春敗之復霍丘安
豐二縣是月借江浙坊場錢一界以備軍費十一月戊
申太白晝見庚戌賞承州水砦首領徐康等要擊金兵
之功轉官有差仍蠲承楚泰州水砦民兵賦役十年置
沿江烽火放浙東諸郡防城丁夫壬子始下詔聲劉豫
逆罪諭親討之旨以厲六師吳玠遣統制楊從儀等率

兵敗金人于臘家城癸丑玠乞納節贖劉子羽罪遂聽
子羽自便金人入光州甲寅偽齊知光州許約破石額
山砦遂據之乙卯韓世忠遣兵夜劫金人營于承州破
之金人犯六合縣丙辰掠全椒縣三城湖丁巳戒諸路
大小臣僚借貸催科縱吏姦擾民及務絕盜賊之伺隙
者命董旼趙康直總領淮東水砦戊午以胡松年兼權
參知政事金人陷滁州劉光世移軍建康韓世忠移軍
鎮江張浚移軍常州己未復命張浚知樞密院事以其

盡忠竭節詔諭中外庚申宴犒守江將士癸亥劉光世
遣統制王德擊金人于滁州之桑根敗之揭黃榜招諭
湖賊甲子命滁和諸州移治保聚乙丑金人犯滁州已
已劉光世遣統制王師晟等率兵夜入南壽春府襲金
人敗之執偽齊知府王靖廣賊區稠圍韶州樂昌縣鈐
轄韓京遣兵擊斬之詔張浚視師江上十二月乙亥朔
魏良臣王繪還自泗州軍前入見戊寅命都督府右軍
統制李貴部兵屯扼福山鎮辛巳命中軍統制王進屯

兵泰州防拓通泰壬午以樞密都承旨馬擴為江西沿江制置副使丙戌吳倫遣兵攻臘家城破之丁亥聽兩淮避兵民耕種所在閒田壬辰金齊兵逼廬州仇愈嬰城固守岳飛所遣統制徐慶牛皋援兵適至敗走之劉光世亦遣統制靳賽戰于慎縣張浚遣統制張宗顏擊敗金人于六合詔江浙荆湖十四郡各募水軍五百人名橫江軍兩浙十郡沿江海州縣招捕巡檢土軍甲午程昌寓遣杜湛彭筠合擊楊欽破之己亥以來年正旦

日食下詔修闕政求直言庚子金人退師辛丑詔葬祭
浙西江東二軍之死事者壬寅省淮南轉運司遣胡松
年往常熟縣江陰軍沿江計議軍事癸卯金人去滁州

宋史卷二十七

宋史卷二十七考證

高宗紀四紹興三年秋七月丁卯詔訪求累朝勲臣曹

彬等三百人子孫以備錄用○

臣蒲封

按續文獻通

考徽猷閣待制宗伯友入對言功臣子孫凋喪殆盡
乞訪其後量才錄用故有是詔其後得趙普趙安仁
范質錢若水諸孫皆官之

宋史卷二十七考證